

अथ पञ्चमं मण्डलम् ।

प्रथमोऽनुवाकः

(१) प्रथमं सूक्तम्

(१-१२) द्वादशर्चस्यास्य सूक्तस्यात्रेयौ बुधगविष्टिरावृषी ।

अग्निर्देवता । त्रिष्टुप् छन्दः

अबोध्याग्निः समिधा जनानां प्रति धेनुमिवायतीमुषासम् ।
यद्वा इव प्र वयामुज्जिहानाः प्र भानवः सिस्रते नाकमच्छ १
अबोधि होता यजथाय देवा नूध्वो अग्निः सुमनाः प्रातरस्थात् ।
समिद्धस्य रुशददर्शि पाजौ महान् देवस्तमसो निरमोचि २
यदी गणस्य रशनामजीगुः शुचिरङ्गे शुचिभिर्गोभिरग्निः ।
आद् दक्षिणा युज्यते वाजय न्युत्तानामूध्वो अंधयजुहूभिः ३
अग्निमच्छा देवयतां मनासि चक्षूषीव सूर्ये सं चरन्ति ।
यदी सुवाते उषसा विरूपे श्वेतो वाजी जायते अग्ने अह्वाम् ४
जनिष्ट हि जेन्यो अग्ने अह्वा हितो हितेष्वरुषो वनेषु ।
दमेदमे सप्त रत्ना दधानो ऽग्निर्होता नि षसादा यजीयान् ५
अग्निर्होता न्यसीद्दद् यजीया नुपस्थे मातुः सुरभा उ लोके ।
युवा क्विः पुरुनिःष्ठ ऋतावा धर्ता कृष्टीनामुत मध्य इद्धः ६
प्र णु त्यं विप्रमध्वरेषु साधु मग्निं होतारमीळते नमोभिः ।
आ यस्ततान् रोदसी ऋतेन नित्यं मृजन्ति वाजिनं घृतेन ७
मार्जाल्यो मृज्यते स्वे दमूनाः कविप्रशस्तो अतिथिः शिवो नः ।
सहस्रशृङ्गो वृषभस्तदौजा विश्वा अग्ने सहसा प्रास्यन्यान् ८
प्र सद्यो अग्ने अत्येष्यन्या नाविर्यस्मै चारुतमो बभूथ ।
ईळैन्यो वपुष्यो विभावा प्रियो विशामतिथिर्मानुषीणाम् ९
तुभ्यं भरन्ति क्षितयो यविष्ठ बलिमग्ने अन्तित ओत दूरात् ।
आ भन्दिष्ठस्य सुमतिं चिकिद्धि बृहत् तै अग्ने महि शर्म भद्रम् १०
आद्य रथं भानुमो भानुमन्त मग्ने तिष्ठ यजतेभिः समन्तम् ।
विद्वान् पथीनामुर्वशन्तरिक्ष मेह देवान् हविरद्याय वक्षि ११
अवोचाम क्वये मेध्याय वचो वन्दारु वृषभाय वृषो ।
गविष्टिरो नमसा स्तोममग्नौ दिवीव रुक्ममुरुव्यञ्जमश्रेत् १२

(२) द्वितीयं सूक्तम्

(१-१२) द्वादशर्चस्यास्य सूक्तस्य (१, ३-८, १०-१२) प्रथमर्चस्तृतीयादिषण्णां
दशम्यादितृचस्य चात्रेयः कुमारो जानो वृशो वा, उभौ वा, (२, ६)

द्वितीयानवम्योश्च जानो वृश ऋषिः । अग्निर्देवता । (१-११) प्रथमाद्येकादशर्चा
त्रिष्टुप्, (१२) द्वादश्याश्च शक्वरी छन्दसी

कुमारं माता युवतिः समुब्धं गुहा बिभर्ति न ददाति पित्रे ।
अनीकमस्य न मिनज्जनासः पुरः पश्यन्ति निहितमरुतौ १
कमेतं त्वं युवते कुमारं पेषी बिभर्षि महिषी जजान ।
पूर्वीर्हि गर्भः शरदौ ववर्धा ऽपश्यं जातं यदसूत माता २
हिरण्यदन्तं शुचिवर्णमारात् क्षेत्रादपश्यमायुधा मिमानम् ।
ददानो अस्मा अमृतं विपृक्वत् किं मामनिन्द्राः कृणवन्ननुक्थाः ३
क्षेत्रादपश्यं सनुतश्चरन्तं सुमद् यूथं न पुरु शोभमानम् ।
न ता अंगृभ्रन्नर्जनिष्ट हि षः पलिक्नीरिद् युवतयो भवन्ति ४
के मे मर्यकं वि यवन्त गोभिर्न येषां गोपा अरणश्चिदास ।
य ई जगृभुरव ते सृजन्त्वाजाति पश्च उप नश्चिकित्वान् ५
वसां राजानं वसतिं जनाना मरातयो नि दधुर्मत्येषु ।
ब्रह्माण्यत्रेव तं सृजन्तु निन्दितारो निन्द्यासो भवन्तु ६
शुनश्चिच्छेपं निर्दितं सहस्राद् यूपादमुञ्चो अशमिष्ट हि षः ।
एवास्मदग्ने वि मुमुग्धि पाशान् होतश्चिकित्व इह तू निषद्य ७
हणीयमानो अप हि मदैयेः प्र मे देवाना व्रतपा उवाच ।
इन्द्रो विद्वां अनु हि त्वा चचक्ष तेनाहमग्ने अनुशिष्ट आगाम् ८
वि ज्योतिषा बृहता भात्यग्नि राविर्विश्वानि कृणुते महित्वा ।
प्रादेवीर्मायाः सहते दुरेवाः शिशीते शृङ्गे रक्षसे विनिक्षे ९
उत स्वानासौ दिवि षन्त्वग्ने स्तिग्मायुधा रक्षसे हन्तवा उ ।
मदै चिदस्य प्र रुजन्ति भामा न वरन्ते परिबाधो अदेवीः १०
एतं ते स्तोमं तुविजातु विप्रो रथं न धीरः स्वपा अतक्षम् ।
यदीदग्ने प्रति त्वं दैव हर्याः स्वर्वतीरप एना जयेम ११
तुविग्रीवो वृषभो वावृधानो ऽशत्र्वर्ष्यः समजाति वेदः ।
इतीममग्निमृता अवोचन् बर्हिष्मते मनवे शर्म
यंस द्वविष्मते मनवे शर्म यंसत् १२

(३) तृतीयं सूक्तम्

(१-१२) द्वादशर्चस्यास्य सूक्तस्यात्रेयो वसुश्रुत ऋषिः । (१-२, ४-१२)
 प्रथमाद्वितीययोर्ऋचोश्चतुर्थ्यादिनवानाञ्चाग्निः, (३) तृतीयायाश्च मरुद्द्रविष्णवो
 देवताः । (१) प्रथमर्चो विराट्, (२-१२) द्वितीयाद्येकादशानाञ्च त्रिष्टुप् छन्दसी
 त्वमग्ने वरुणो जायसे यत् त्वं इमत्रो भवसि यत् समिद्धः ।
 त्वे विश्वे सहसस्पुत्र देवा स्त्वमिन्द्रो दाशुषे मर्त्याय १
 त्वमर्यमा भवसि यत् कनीनां नाम स्वधावन् गुह्यं इबभर्षि ।
 अञ्जन्ति मित्रं सुधितं न गोभिर्यद् दंपती समनसा कृणोषि २
 तव श्रिये मरुतो मर्जयन्त रुद्र यत् ते जनिम् चारु चित्रम् ।
 पदं यद् विष्णोरुपमं निधायि तेन पासि गुह्यं नाम गोनाम् ३
 तव श्रिया सुदृशो देव देवाः पुरू दधाना अमृतं सपन्त ।
 होतारमग्निं मनुषो नि षैदुर्दशस्यन्त उशिजः शंसमायोः ४
 न त्वद्धोता पूर्वा अग्ने यजीयान् न काव्यैः पुरो अस्ति स्वधावः ।
 विशश्च यस्या अतिथिर्भवासि स यज्ञेन वनवद् देव मर्तान् ५
 वयमग्ने वनुयाम् त्वोता वसूयवो हविषा बुध्यमानाः ।
 वयं समर्ये विदथेष्वह्ना वयं राया सहसस्पुत्र मर्तान् ६
 यो न आगौ अभ्येनो भरा त्यधीदघमघशसे दधात ।
 जही चिकित्वो अभिशस्तिमेता मग्ने यो नो मर्चयति द्वयेन ७
 त्वामस्या व्युषि देव पूर्वे दूतं कृणवाना अयजन्त हव्यैः ।
 संस्थे यदग्र ईयसे रयीणां देवो मर्तैर्वसुभिरिध्यमानः ८
 अवं स्पृधि पितरं योधि विद्वान् पुत्रो यस्तै सहसः सून ऊहे ।
 कदा चिकित्वो अभि चक्षसे नो ऽग्ने कदाँ ऋतचिद् यातयासे ९
 भूरि नाम् वन्दमानो दधाति पिता वसो यदि तज्जोषयासे ।
 कुविद् देवस्य सहसा चकानः सुम्रमग्निर्वनते वावृधानः १०
 त्वमङ्ग जरितारं यविष्ट विश्वान्यग्ने दुरिताति पर्षि ।
 स्तेना अदृश्रन् रिपवो जनासो ऽज्ञातकेता वृजिना अभूवन् ११
 इमे यामासस्त्वद्रिगभूवन् वसवे वा तदिदागौ अवाचि ।
 नाहायमग्निरभिशस्तये नो न रीषते वावृधानः परा दात् १२

(४) चतुर्थं सूक्तम्

(१-११) एकादशर्चस्यास्य सूक्तस्यात्रेयो वसुश्रुत ऋषिः । अग्निर्देवता ।

त्रिष्टुप् छन्दः

त्वामग्ने वसुपतिं वसूना मृभि प्र मन्दे अध्वरेषु राजन् ।
 त्वया वाजं वाजयन्तो जयेमा भि ष्याम पृत्सुतीर्मत्यानाम् १
 हव्यवाळग्रिजरः पिता नो विभुर्विभावा सुदृशीको अस्मे ।
 सुगार्हपत्याः समिषो दिदी ह्यस्मद्रयश्क सं मिमीहि श्रवासि २
 विशां क्विं विश्पतिं मानुषीणां शुचिं पावकं घृतपृष्ठमग्निम् ।
 नि होतारं विश्वविदं दधिध्वे स देवेषु वनते वार्याणि ३
 जुषस्वाम् इळ्या सजोषा यतमानो रश्मिभिः सूर्यस्य ।
 जुषस्व नः समिधं जातवेद आ च देवान् हविरद्याय वक्षि ४
 जुष्टो दमूना अतिथिर्दुरोण इमं नो यज्ञमुप याहि विद्वान् ।
 विश्वा अग्ने अभियुजो विहत्या शत्रूयतामा भरा भोजनानि ५
 वधेन दस्युं प्र हि चातयस्व वयः कृणवानस्तन्वेऽ स्वायै ।
 पिपर्षि यत् सहसस्पुत्र देवान् त्सो अग्ने पाहि नृतम् वाजं अस्मान् ६
 वयं तै अग्न उक्थैर्विधेम वयं हव्यैः पावक भद्रशोचे ।
 अस्मे रयिं विश्ववारं समिन्वा स्मे विश्वानि द्रविणानि धेहि ७
 अस्माकमग्ने अध्वरं जुषस्व सहसः सूनो त्रिषधस्थ हव्यम् ।
 वयं देवेषु सुकृतः स्याम शर्मणा नस्त्रिवरूथेन पाहि ८
 विश्वानि नो दुर्गहा जातवेदः सिन्धुं न नावा दुरिताति पर्षि ।
 अग्ने अत्रिवन्नमसा गृणानोऽऽस्माकं बोध्यविता तनूनाम् ९
 यस्त्वा हदा कीरिणा मन्यमानो ऽमर्त्य मर्त्यो जोहवीमि ।
 जातवेदो यशो अस्मासु धेहि प्रजाभिरग्ने अमृतत्वमश्याम् १०
 यस्मै त्वं सुकृते जातवेद उ लोकमग्ने कृणवः स्योनम् ।
 अश्विनं स पुत्रिणं वीरवन्तं गोमन्तं रयिं नशते स्वस्ति ११

(५) पञ्चमं सूक्तम्

(१-११) एकादशर्चस्यास्य सूक्तस्यात्रेयो वसुश्रुत ऋषिः । (१) प्रथमर्च इध्मः
 समिद्धो वाग्निः, (२) द्वितीयाया नराशंसः, (३) तृतीयाया इळः, (४) चतुर्थ्या

बर्हिः, (५) पञ्चम्या देवीद्वारः, (६) षष्ठ्या उषासानक्ता, (७) सप्तम्या दैव्यौ
होतारौ प्रचेतसौ, (८) अष्टम्यास्तिस्त्रो देव्यः सरस्वतीळाभारत्यः, (९)
नवम्यास्त्वष्टा, (१०) दशम्या वनस्पतिः, (११) एकादश्याश्च स्वाहाकृतयो
देवताः । गायत्री छन्दः

सुसमिद्धाय शोचिषै घृतं तीव्रं जुहोतन । अग्रयै जातवेदसे १
नराशंसः सुषूदती मं यज्ञमदाभ्यः । कविर्हि मधुहस्त्यः २
ईळितो अग्र आ वहेन्द्रं चित्रमिह प्रियम् । सुखै रथैभिरूतये ३
ऊर्णमदा वि प्रथस्वा ऽभ्यर्का अनूषत । भवो नः शुभ्र सातये ४
देवीद्वारो वि श्रयध्वं सुप्रायणा न ऊतये । प्रप्र यज्ञं पृणीतन ५
सुप्रतीके वयोवृधा यही ऋतस्य मातरा । दोषामुषासमीमहे ६
वार्तस्य पत्सनीळिता दैव्या होतारा मनुषः । इमं नो यज्ञमा गतम् ७
इळा सरस्वती मही तिस्रो देवीर्मयोभुवः । बर्हिः सीदन्त्वस्त्रिधः ८
शिवस्त्वष्टरिहा गहि विभुः पोष उत त्मना । यज्ञेयज्ञे न उदव ९
यत्र वेत्थ वनस्पते देवानां गुह्या नामानि । तत्र हव्यानि गामय १०
स्वाहाग्रये वरुणाय स्वाहेन्द्राय मरुद्भ्यः । स्वाहा देवेभ्यो हविः ११

(६) षष्ठं सूक्तम्

(१-१०) दशर्चस्यास्य सूक्तस्यात्रेयो वसुश्रुत ऋषिः । अग्निर्देवता । पङ्क्तिश्छन्दः
अग्निं तं मन्ये यो वसु रस्तं यं यन्ति धेनवः ।
अस्तमर्वन्त आशवो ऽस्तं नित्यासो वाजिन इषं स्तोतृभ्य आ भर १
सो अग्निर्यो वसुर्गृणे सं यमायन्ति धेनवः ।
समर्वन्तो रघुद्रुवः सं सुजातासः सूरय इषं स्तोतृभ्य आ भर २
अग्निर्हि वाजिनं विशे ददाति विश्वर्चर्षणिः ।
अग्नी राये स्वाभुवं स प्रीतो याति वार्य मिषं स्तोतृभ्य आ भर ३
आ तै अग्र इधीमहि द्युमन्तं देवाजरम् ।
यद्ध स्या ते पनीयसी समिद् दीदर्यति द्यवी षं स्तोतृभ्य आ भर ४
आ तै अग्र ऋचा हविः शुक्रस्य शोचिषस्पते ।
सुश्चन्द्र दस्म विश्पते हव्यवाद् तुभ्यं हूयत इषं स्तोतृभ्य आ भर ५
प्रो त्ये अग्रयोऽग्निषु विश्वं पुष्यन्ति वार्यम् ।
ते हिन्विरे त इन्विरे त इषयन्त्यानुष गिषं स्तोतृभ्य आ भर ६

तव॒ त्ये अ॒ग्ने अ॒र्चयो॑ महि॒ व्राधन्त॑ वा॒जिनः॑ ।
 ये प॒त्वभिः॑ श॒फानां॑ व्रजा भु॒रन्त॑ गो॒ना॒ मिषं॑ स्तो॒तृभ्य॑ आ भ॒र ७
 नवां॑ नो अ॒ग्र आ भ॒र स्तो॒तृभ्यः॑ सु॒क्षिती॑रिषः ।
 ते स्या॑म॒ य आ॑नृ॒चु॒ स्त्वादू॑तासो॒ दमे॑दम॒ इषं॑ स्तो॒तृभ्य॑ आ भ॒र ८
 उ॒भे सु॑श्चन्द्र॒ सर्पि॑षो॒ दवीं॑ श्रीणीष आ॒सनि॑ ।
 उ॒तो न॒ उ॒त् पु॑पूर्या॒ उ॒क्थेषु॑ शवसस्प॒त॒ इषं॑ स्तो॒तृभ्य॑ आ भ॒र ९
 एवाँ॑ अ॒ग्निर्म॑जुर्यमु॒र्गीर्भिर्य॑ज्ञेभिरानुषक् ।
 द॒धद॑स्मे सु॒वीर्य॑मु॒त त्यदा॑श्वश्च॒ य॒ मिषं॑ स्तो॒तृभ्य॑ आ भ॒र १०

(७) सप्तमं सूक्तम्

(१-१०) दशर्चस्यास्य सूक्तस्यात्रेय इष ऋषिः । अग्निर्देवता । (१-९)

प्रथमादिनवर्चामनुष्टुप्, (१०) दशम्याश्च पङ्क्तिश्छन्दसी

सखा॑यः सं वः॑ स॒म्यञ्च॑ मिषं॒ स्तोमं॑ चा॒ग्रयै॑ ।
 वर्षि॑ष्ठाय क्षि॒तीना॑ मूर्जो॒ न॒ज्रे सह॑स्वते १
 कुत्रा॑ चिद् यस्य॒ समृ॑तौ र॒गवा॑ नरो॒ नृष॑दने ।
 अ॒ह॑न्तश्चिद् यमि॒न्धते॑ स॒जन॑यन्ति ज॒न्तवः॑ २
 सः यद्वि॑षो वना॑महे सं ह॒व्या मानु॑षाणाम् ।
 उ॒त द्यु॑म॒स्य श॑वस॒ ऋ॒तस्य॑ र॒श्मिमा॑ द॒दे ३
 स स्मा॑ कृ॒णोति॑ के॒तुमा॑ नक्तं चि॒हूर॑ आ स॒ते ।
 पा॒व॒को यद् वन॑स्पतीन् प्र स्मा॑ मि॒नात्य॑जरः ४
 अ॒व॒ स्म॒ यस्य॑ वे॒षणे॑ स्वेदं प॒थिषु॑ जुहति ।
 अ॒भीम॑ह॒ स्वजे॑न्यं भूमा॑ पृ॒ष्ठेव॑ रुरुहुः ५
 यं म॒र्त्यः पु॑रुस्पृहं वि॒दद् विश्व॑स्य॒ धार्य॑से ।
 प्र स्वा॑दनं इ॒पतू॑ना मस्त॑तातिं चिदा॒यवै॑ ६
 स हि ष्मा॑ धन्वा॒क्षितं॑ दा॒ता न॑ दात्या प॒शुः ।
 हि॒रि॑श्मश्रुः शुचि॑द नृ॒भुरनि॑भृष्टतविषिः ७
 शुचिः॑ ष्म॒ यस्मा॑ अ॒त्रिव॑त् प्र स्वधि॑तीव॒ रीय॑ते ।
 सु॒धूर॑सूत मा॒ता क्रा॑णा यदा॒न॒शे भ॑गम् ८
 आ यस्तै॑ सर्पि॒रासु॑ते ऽग्ने॒ शम॑स्ति॒ धार्य॑से ।
 ऐषु॑ द्यु॒म॒मु॒त श्र॑व॒ आ चि॒त्तं म॒र्त्येषु॑ धाः ९

इति चिन्मन्युमध्विज स्त्वादात्तमा पशं ददे ।
आदग्ने अपृणतो ऽग्निः सासह्याद् दस्यू निषः सासह्यान्नचफट्टन् १०

(८) अष्टमं सूक्तम्

(१-७) सप्तर्चस्यास्य सूक्तस्यात्रेय इष ऋषिः । अग्निर्देवता । जगती छन्दः
त्वामग्ने ऋतायवः समीधिरे प्रत्नं प्रत्नास ऊतये सहस्कृत ।
पुरुश्चन्द्रं यजतं विश्वधायसं दमूनसं गृहपतिं वरैरयम् १
त्वामग्ने अतिथिं पूर्य विशः शोचिष्केशं गृहपतिं नि षैदिरे ।
बृहत्कैतुं पुरुरूपं धनुस्पृतं सुशर्माणं स्वर्वसं जरद्विषम् २
त्वामग्ने मानुषीरीळते विशो होत्राविदं विविचिं रत्नधातमम् ।
गुहा सन्तं सुभग विश्वदर्शतं तुविष्वणसं सुयजं घृतश्रियम् ३
त्वामग्ने धर्णसिं विश्वधा वयं गीर्भिर्गृणन्तो नमसोप सेदिम ।
स नो जुषस्व समिधानो अङ्गिरो देवो मर्तस्य यशसा सुदीतिभिः ४
त्वामग्ने पुरुरूपो विशेविशे वयो दधासि प्रत्ना पुरुष्टुत ।
पुरुरयन्ना सहसा वि राजसि त्विषिः सा तै तित्विषाणस्य नाधृषे ५
त्वामग्ने समिधानं यविष्ठ्य देवा दूतं चक्रिरे हव्यवाहनम् ।
उरुजयसं घृतयोनिमाहुतं त्वेषं चक्षुर्दधिरे चोदयन्मति ६
त्वामग्ने प्रदिव आहुतं घृतैः सुम्नायवः सुषमिधा समीधिरे ।
स वावृधान ओषधीभिरुक्षितोऽभि जयांसि पार्थिवा वि तिष्ठसे ७
इति तृतीयोष्टकः

अथ चतुर्थोऽष्टकः ।

प्रथमोऽध्यायः

। व० १ । १३

(९) नवमं सूक्तम्

(१-७) सप्तर्चस्यास्य सूक्तस्यात्रेयो गय ऋषिः । अग्निर्देवता । (१-४, ६)
प्रथमादिचतुर्भृचां षष्ठ्याश्चानुष्टुप्, (५, ७) पञ्चमीसप्तम्योश्च पङ्क्तिश्छन्दसी
त्वामग्ने हविष्मन्तो देवं मर्तास ईळते ।
मन्यै त्वा जातवैदसं स हव्या वक्ष्यानुषक् १

अग्निर्होता दास्वतः क्षयस्य वृक्तबर्हिषः ।
 सं यज्ञासश्चरन्ति यं सं वाजासिः श्रवस्यवः २
 उत स्म यं शिशुं यथा नवं जनिष्टारणी ।
 धर्तारं मानुषीणां विशामग्निं स्वध्वरम् ३
 उत स्म दुर्गभीयसे पुत्रो न ह्यार्याणाम् ।
 पुरू यो दग्धासि वना ऽग्रे पशुर्न यवसे ४
 अर्धं स्म यस्यार्चयः सम्यक् संयन्ति धूमिनः ।
 यदीमहं त्रितो दिव्युप ध्मातेव धमति शिशीते ध्मातरी यथा ५
 तवाहमग्र ऊतिभिर्मित्रस्य च प्रशस्तिभिः ।
 द्वेषोयुतो न दुरिता तुर्याम मर्त्यानाम् ६
 तं नो अग्रे अभी नरो रयिं सहस्व आ भर ।
 स क्षैपयत् स पौषयद् भुवद् वाजस्य सातय उतैधि पृत्सु नो वृधे ७

(१०) दशमं सूक्तम्

(१-७) सप्तर्चस्यास्य सूक्तस्यात्रेयो गय ऋषिः । अग्निर्देवता । (१-३, ५-६)
 प्रथमादितृचस्य पञ्चमीषष्ठ्योर्त्रचोश्चानुष्टुप् (४, ७) चतुर्थीसप्तम्योश्च पङ्क्तिश्छन्दसी
 अग्र ओजिष्ठमा भर द्युम्रमस्मभ्यमधिगो ।
 प्र नो राया परीणसा रत्सि वाजाय पन्थाम् १
 त्वं नो अग्रे अब्रुत क्रत्वा दक्षस्य मंहना ।
 त्वे असुर्यश्मारुहत् क्राणा मित्रो न यज्ञियः २
 त्वं नो अग्र एषां गर्यं पुष्टिं च वर्धय ।
 ये स्तोमैभिः प्र सूरयो नरो मघान्यानुशुः ३
 ये अग्रे चन्द्र ते गिरः शम्भन्त्यश्चराधसः ।
 शुष्मैभिः शष्मिणो नरो दिवश्चिद् येषां बृहत् सुकीर्तिर्बोधति त्मना ४
 तव त्वे अग्रे अर्चयो भ्राजन्तो यन्ति धृष्णुया ।
 परिज्मानो न विद्युतः स्वानो रथो न वाजियुः ५
 नू नो अग्र ऊतयै सबाधसश्च रातयै ।
 अस्माकासश्च सूरयो विश्वा आशास्तरीषणि ६
 त्वं नो अग्रे अङ्गिरः स्तुतः स्तवान् आ भर ।
 होतर्विभ्वासह रयिं स्तोतृभ्यः स्तवसे च न उतैधि पृत्सु नो वृधे ७

(११) एकादशं सूक्तम्

(१-६) षड्चस्यास्य सूक्तस्यात्रेयः सुतम्भर ऋषिः । अग्निर्देवता । जगती छन्दः
जनस्य गोपा अजनिष्ट जागृवि रग्निः सुदक्षः सुविताय नव्यसे ।
घृतप्रतीको बृहता दिविस्पृशा द्युमद् वि भाति भरतेभ्यः शुचिः १
यज्ञस्य केतुं प्रथमं पुरोहितं मग्निं नरस्त्रिषधस्थे समीधिरे ।
इन्द्रेण देवैः सरथं स बर्हिषि सीदन्नि होता यजथाय सुक्रतुः २
असंमृष्टो जायसे मात्रोः शुचिर्मन्द्रः कविरुदतिष्ठो विवस्वतः ।
घृतेन त्वावर्धयन्नग्र आहुत धूमस्तै केतुरभवद् दिवि श्रितः ३
अग्निर्नो यज्ञमुप वेतु साधुया ऽग्निं नरो वि भरन्ते गृहेगृहे ।
अग्निर्दूतो अभवद्धव्यवाहनो ऽग्निं वृणाना वृणते कविक्रतुम् ४
तुभ्येदमग्ने मदुमत्तमं वचस्तुभ्यं मनीषा इयमस्तु शं हृदे ।
त्वां गिरः सिन्धुमिवावनीर्मही रा पृणन्ति शर्वसा वर्धयन्ति च ५
त्वामग्ने अङ्गिरसो गुहा हित मन्वविन्दञ्छ्रियाणं वनेवने ।
स जायसे मथ्यमानः सहो महत् त्वामाहुः सहसस्पुत्रमङ्गिरः ६

(१२) द्वादशं सूक्तम्

(१-६) षड्चस्यास्य सूक्तस्यात्रेयः सुतम्भर ऋषिः । अग्निर्देवता । त्रिष्टुप् छन्दः
प्राग्र्यै बृहते यज्ञियाय ऋतस्य वृष्णे असुराय मन्म ।
घृतं न यज्ञ आस्येइ सुपूतं गिरं भरे वृषभार्य प्रतीचीम् १
ऋतं चिकित्वा ऋतमिच्चिकिद्धयु तस्य धारा अनु तृन्धि पूर्वीः ।
नाहं यातुं सहसा न द्वयेन ऋतं संपाम्यरुषस्य वृष्णाः २
कया नो अग्र ऋतर्यवृतेन भुवो नवेदा उचर्थस्य नव्यः ।
वेदा मे देव ऋतुपा ऋतूनां नाहं पतिं सनितुरस्य रायः ३
के ते अग्ने रिपवे बन्धनासः के पायवः सनिषन्त द्युमन्तः ।
के धासिमग्ने अनृतस्य पान्ति क आसतो वचसः सन्ति गोपाः ४
सखायस्ते विषुणा अग्र एते शिवासः सन्तो अशिवा अभूवन् ।
अधूर्षत स्वयमेते वचोभि ऋजूयते वृजिनानि ब्रुवन्तः ५
यस्तै अग्ने नमसा यज्ञमीदृ ऋतं स पात्यरुषस्य वृष्णाः ।
तस्य क्षयः पृथुरा साधुरेतु प्रसस्त्राणस्य नहुषस्य शेषः ६

(१३) त्रयोदशं सूक्तम्

(१-६) षडृचस्यास्य सूक्तस्यात्रेयः सुतम्भर ऋषिः । अग्निर्देवता । गायत्री छन्दः
 अर्चन्तस्त्वा हवामहे ऽर्चन्तः समिधीमहि । अग्ने अर्चन्त ऊतये १
 अग्नेः स्तोमं मनामहे सिध्मद्य दिविस्पृशः । देवस्य द्रविणस्यवः २
 अग्निर्जुषत नो गिरो होता यो मानुषेष्ववा । स यज्ञद् दैव्यं जनम् ३
 त्वमग्ने सप्रथा असि जुष्टो होता वरैणयः । त्वया यज्ञं वि तन्वते ४
 त्वामग्ने वाजसातमं विप्रां वर्धन्ति सुष्टुतम् । स नो रास्व सुवीर्यम् ५
 अग्ने नेमिराँ इव देवाँस्त्वं परिभूरसि । आ राधश्चित्रमृञ्जसे ६

(१४) चतुर्दशं सूक्तम्

(१-६) षडृचस्यास्य सूक्तस्यात्रेयः सुतम्भर ऋषिः । अग्निर्देवता । गायत्री छन्दः
 अग्निं स्तोमैर्न बोधय समिधानो अमर्त्यम् । हव्या देवेषु नो दधत् १
 तमध्वरेष्वीळते देवं मर्ता अमर्त्यम् । यजिष्ठं मानुषे जनै २
 तं हि शश्वन्त ईळते स्नुचा देवं घृतश्रुता । अग्निं हव्याय वोळहवे ३
 अग्निर्जातो अरोचत् घ्नन् दस्यूञ्जयोतिषा तमः । अविन्दद् गा अपः स्वः ४
 अग्निमीळेन्यं कविं घृतपृष्ठं सपर्यत । वेतु मे शृणवद्ध्रवम् ५
 अग्निं घृतेन वावृधुः स्तोमैर्भिर्विश्वचर्षणिम् । स्वाधीभिर्वचस्युभिः ६

द्वितीयोऽनुवाकः

। सू० १५ ।३२

(१५) पञ्चदशं सूक्तम्

(१-५) पञ्चर्चस्यास्य सूक्तस्याङ्गिरसो धरुण ऋषिः । अग्निर्देवता ।

त्रिष्टुप् छन्दः

प्र वेधसै क्वये वेद्याय गिरं भरे यशसै पूर्वाय ।
 घृतप्रसक्तो असुरः सुशेवो रायो धर्ता धरुणो वस्वो अग्निः १
 ऋतेन ऋतं धरुणं धारयन्त यज्ञस्य शाके परमे व्योमन् ।
 दिवो धर्मन् धरुणं सेदुषो नृञ्जातैरजाताँ अभि ये ननुत्तुः २
 अंहोयुर्वस्तन्वस्तन्वते वि वयो महद् दुष्टरं पूर्वाय ।
 स संवतो नवजातस्तुत्यात् सिंहं न क्रुद्धमभितुः परिष्ठुः ३
 मातेव यद् भरसे पप्रथानो जनंजनं धार्यसे चक्षसे च ।

वयोवयो जरसे यद् दधानुः परि त्मना विषुरूपो जिगासि ४
वाजो नु ते शर्वसस्पात्वन्तं मुरुं दोर्धं धरुणं देव रायः ।
पदं न तायुर्गुहा दधानो महो राये चितयन्नत्रिमस्पः ५

(१६) षोडशं सूक्तम्

(१-५) पञ्चर्चस्यास्य सूक्तस्यात्रेयः पूरुर्ऋषिः । अग्निर्देवता । (१-४)

प्रथमादिचतुर्ऋचामनुष्टुप् , (५) पञ्चम्याश्च पङ्क्तिश्छन्दसी
बृहद् वयो हि भानवे ऽर्चा देवायाग्रयै ।
यं इमत्रं न प्रशस्तिभिर्मर्तासो दधिरे पुरः १
स हि द्युभिर्जनानां होता दक्षस्य ब्राह्मोः ।
वि हव्यमग्निरानुषग्भगो न वारमृशवति २
अस्य स्तोमैर्मघोनः सख्ये वृद्धशौचिषः ।
विश्वा यस्मिन् तुविष्वणि समर्थे शुष्ममादधुः ३
अधा ह्यग्र एषां सुवीर्यस्य मंहना ।
तमिद् यद्द्वं न रोदसी परि श्रवो बभूवतुः ४
नू न एहि वार्यमग्रे गृणान आ भर ।
ये वयं ये च सूरयः स्वस्ति धामहे सचो तैर्धि पृत्सु नो वृधे ५

(१७) सप्तदशं सूक्तम्

(१-५) पञ्चर्चस्यास्य सूक्तस्यात्रेयः पूरुर्ऋषिः । अग्निर्देवता । (१-४)

प्रथमादिचतुर्ऋचामनुष्टुप् , (५) पञ्चम्याश्च पङ्क्तिश्छन्दसी
आ यज्ञैर्देवमर्त्य इत्था तव्यासमूतयै ।
अग्निं कृते स्वध्वरे पूरुरीळीतावसे १
अस्य हि स्वयंशस्तर आसा विधर्मन् मन्यसे ।
तं नाकं चित्रशौचिषं मन्द्रं पुरो मनीषया २
अस्य वासा उ अर्चिषा य आयुक्त तुजा गिरा ।
दिवो न यस्य रेतसा बृहच्छोचन्त्यर्चयः ३
अस्य क्रत्वा विचैतसो दस्मस्य वसु रथ आ ।
अधा विश्वासु हव्यो ऽग्निर्विदु प्र शस्यते ४
नू न इद्धि वार्यमासा संचन्त सूरयः ।

ऊर्जा नपादभिष्टये पाहि शग्धि स्वस्तये उतैधि पृत्सु नो वृधे ५

(१८) अष्टादशं सूक्तम्

(१-५) पञ्चर्चस्यास्य सूक्तस्य मृक्तवाहा आत्रेयो द्वित ऋषिः । अग्निर्देवता
। (१-४) प्रथमादिचतुर्ऋचामनुष्टुप् , (५) पञ्चम्याश्च पङ्क्तिश्छन्दसी
प्रातरग्निः पुरुप्रियो विशः स्तवेतातिथिः ।
विश्वानि यो अमर्त्यो हव्या मर्तेषु रण्यति १
द्विताय मृक्तवाहसे स्वस्य दक्षस्य मंहना ।
इन्दुं स धत्त आनुषक् स्तोता चित् ते अमर्त्य २
तं वो दीर्घायुशोचिषं गिरा हुवे मघोनाम् ।
अरिष्टो येषां रथो व्यश्वदावृन्नीयते ३
चित्रा वा येषु दीर्घिति रासन्नृक्था पान्ति ये ।
स्तीर्णं बर्हिः स्वर्णरे श्रवांसि दधिरे परि ४
ये मे पञ्चाशतं ददु रश्वाणां सधस्तुति ।
द्युमदग््रे महि श्रवो बृहत् कृधि मघोनां नृवदमृत नृणाम् ५

(१९) एकोनविंशं सूक्तम्

(१-५) पञ्चर्चस्यास्य सूक्तस्यात्रेयो वव्रिर्ऋषिः । अग्निर्देवता । (१-२)
प्रथमाद्वितीययोर्ऋचोर्गायत्री, (३-४) तृतीयाचतुर्थ्योरनुष्टुप् , (५) पञ्चम्याश्च विराड् रूपा छन्दांसि
अभ्यवस्थाः प्र जायन्ते प्र वव्रेर्वव्रिश्चिकेत । उपस्थे मातुर्वि चष्टे १
जुहुरे वि चितयन्तो ऽनिमिषं नृम्णां पान्ति । आ दृळहां पुरं विविशुः २
आ श्वेत्रेयस्य जन्तवो द्युमद् वर्धन्त कृष्टयः ।
निष्कग्रीवो बृहदुक्थ एना मध्वा न वाजयुः ३
प्रियं दुग्धं न काम्यमजामि जाम्योः सचा ।
घर्मो न वाजजठरो ऽदब्धः शश्वतो दभः ४
क्रीळन् नो रश्म आ भुवः सं भस्मना वायुना वेविदानः ।
ता अस्य सन् धृषजो न तिग्माः सुसंशिता वृक्ष्यो वक्षणेस्थाः ५

(२०) विंशं सूक्तम्

(१-४) चतुर्ऋचस्यास्य सूक्तस्यात्रेयाः प्रयस्वन्त ऋषयः । अग्निर्देवता । (१-३)
 प्रथमादितृचस्यानुष्टुप् , (४) चतुर्थ्या ऋचश्च पङ्क्तिश्छन्दसी
 यमग्ने वाजसातम् त्वं चिन् मन्यसे रयिम् ।
 तं नो गीर्भिः श्रवाय्यं देवत्रा पनया युजम् १
 ये अग्ने नेरयन्ति ते वृद्धा उग्रस्य शर्वसः ।
 अप द्वेषो अप हरो ऽन्यव्रतस्य सश्चिरे २
 होतारं त्वा वृणीमहे ऽग्ने दक्षस्य साधनम् ।
 युज्ञेषु पूर्वं गिरा प्रयस्वन्तो हवामहे ३
 इत्था यथा त ऊतये सहसावन् दिवेदिवे ।
 राय ऋताय सुक्रतो गोभिः ष्याम सधमादो वीरैः स्याम सधमादः ४

(२१) एकविंशं सूक्तम्

(१-४) चतुर्ऋचस्यास्य सूक्तस्यात्रेयः सस ऋषिः । अग्निर्देवता । (१-३)
 प्रथमादितृचस्यानुष्टुप् , (४) चतुर्थ्या ऋचश्च पङ्क्तिश्छन्दसी
 मनुष्वत् त्वा नि धीमहि मनुष्वत् समिधीमहि ।
 अग्ने मनुष्वदङ्गिरो देवान् देवयते यज १
 त्वं हि मानुषे जने ऽग्ने सुप्रीत इध्यसे ।
 स्रुचस्त्वा यन्त्यानुषक् सुजात सर्पिरासुते २
 त्वां विश्वे सजोषसो देवासो दूतमक्रत ।
 सपर्यन्तस्त्वा कवे युज्ञेषु देवमीळते ३
 देवं वो देवयज्यया ऽग्निमीळीत मर्त्यः ।
 समिद्धः शुक्र दीदिह्यु तस्य योनिमासदः ससस्य योनिमासदः ४

(२२) द्वाविंशं सूक्तम्

(१-४) चतुर्ऋचस्यास्य सूक्तस्यात्रेयो विश्वसामा ऋषिः । अग्निर्देवता । (१-३)
 प्रथमादितृचस्यानुष्टुप् , (४) चतुर्थ्या ऋचश्च पङ्क्तिश्छन्दसी
 प्र विश्वसामन्नत्रिव दर्चा पावकशौचिषे ।
 यो अर्ध्वरेष्वीडयो होता मन्द्रतमो विशि १
 न्यग्निं जातवैदसं दधाता देवमृत्विजम् ।
 प्र युज्ञ एत्वानुष गृह्या देवव्यचस्तमः २

चिक्विन्मनसं त्वा देवं मर्तास ऊतयै ।
 वरैरयस्य तेऽवस इयानासौ अमन्महि ३
 अग्ने चिक्विद्ध्यस्य न इदं वचः सहस्य ।
 तं त्वा सुशिप्र दंपते स्तोमैर्वर्धन्त्यत्रयो गीर्भिः शुम्भन्त्यत्रयः ४

(२३) त्रयोविंशं सूक्तम्

(१-४) चतुर्ऋचस्यास्य सूक्तस्यात्रेयो विश्वर्चर्षिर्द्युम्न ऋषिः । अग्निर्देवता । (१-
 ३) प्रथमादितृचस्यानुष्टुप् , (४) चतुर्थ्या ऋचश्च पङ्क्तिश्छन्दसी
 अग्ने सहन्तुमा भर द्युम्नस्य प्रासहा रयिम् ।
 विश्वा यश्चर्षणीरभ्याः सा वाजेषु सासहत् १
 तमग्ने पृतनाषह रयिं सहस्व आ भर ।
 त्वं हि सत्यो अब्रुतो दाता वाजस्य गोमतः २
 विश्वे हि त्वा सजोषसो जनासो वृक्तबर्हिषः ।
 होतारं सद्यसु प्रियं व्यन्ति वार्या पुरु ३
 स हि ष्मा विश्वर्चर्षिण रभिमाति सहो दधे ।
 अग्र एषु क्षयेष्वा रेवन्नः शुक्र दीदिहि द्युमत् पावक दीदिहि ४

(२४) चतुर्विंशं सूक्तम्

(१-४) चतुर्ऋचस्यास्य सूक्तस्य बन्धुः सुबन्धुः श्रुतबन्धुर्विप्रबन्धुश्च गौपायना
 लौपायना वा क्रमेणर्षयः । अग्निर्देवता । द्विपदा विराट् छन्दः
 अग्ने त्वं नो अन्तम उत त्राता शिवो भवा वरूथ्यः १
 वसुरग्निर्वसुश्रवा अच्छा नक्षि द्युमत्तमं रयिं दाः १ २
 स नो बोधि श्रुधी हवमुरुष्या गौ अघायतः समस्मात् ३
 तं त्वा शोचिष्ठ दीदिवः सुम्नाय नूनमीमहे सखिभ्यः २ ४

(२५) पञ्चविंशं सूक्तम्

(१-६) नवर्चस्यास्य सूक्तस्यात्रेया वसूयव ऋषयः । अग्निर्देवता । अनुष्टुप् छन्दः
 अच्छा वो अग्निमवसे देवं गांसि स नो वसुः ।
 रासत् पुत्र ऋषूणा मृतावा पर्षति द्विषः १
 स हि सत्यो यं पूर्वे चिद् देवासश्चिद् यमीधिरे ।

होतारं मन्द्रजिह्वमित् सुदीतिभिर्विभावंसुम् २
स नो धीती वरिष्ठया श्रेष्ठया च सुमत्या ।
अग्ने रायो दिदीहि नः सुवृक्तिभिर्वीरय ३
अग्निर्देवेषु राजत्यग्निर्मतेष्वाविशन् ।
अग्निर्नो हव्यवाहनो ऽग्निं धीभिः संपर्यत ४
अग्निस्तुविश्रवस्तमं तुविब्रह्माणमुत्तमम् ।
अतूर्तं श्रावयत्पतिं पुत्रं ददाति दाशुषे ५
अग्निर्ददाति सत्पतिं सासाह यो युधा नृभिः ।
अग्निरत्यं रघुष्यदं जेतारमपराजितम् ६
यद्वाहिष्ठं तदग्र्यै बृहदर्च विभावसो ।
महिषीव त्वद् रयिस्त्वद्वाजा उदीरते ७
तव द्युमन्तो अर्चयो ग्रावैवोच्यते बृहत् ।
उतो तै तन्यतुर्यथा स्वानो अर्त त्मना दिवः ८
एवाँ अग्निं वसूयवः सहसानं ववन्दिम ।
स नो विश्वा अति द्विषुः पर्षन्नावेव सुक्रतुः ९

(२६) षड्विंशं सूक्तम्

(१-६) नवर्चस्यास्य सूक्तस्यात्रेया वसूयव ऋषयः । (१-८) प्रथमाद्यष्टर्चामग्निः,

(९) नवम्याश्च लिङ्गोक्ता देवताः । गायत्री छन्दः

अग्ने पावक रोचिषा मन्द्रया देव जिह्वया । आ देवान् वक्षि यक्षि च १
तं त्वा घृतस्रवीमहे चित्रभानो स्वर्दृशम् । देवाँ आ वीतये वह २
वीतिहौत्रं त्वा कवे द्युमन्तुं समिधीमहि । अग्ने बृहन्तमध्वरे ३
अग्ने विश्वैभिरा गहि देवेभिर्हव्यदातये । होतारं त्वा वृणीमहे ४
यजमानाय सुन्वत आग्ने सुवीर्यं वह । देवैरा संत्सि बृहिषि ५
समिधानः सहस्रजि दग्ने धर्माणि पुष्यसि । देवानां दूत उक्थ्यः ६
न्यश्मिं जातवेदसं होत्रवाहं यविष्ठयम् । दधाता देवमृत्विजम् ७
प्र यज्ञ एत्वानुष गृह्या देवव्यचस्तमः । स्तृणीत बृहिरासदे ८
एदं मरुतो अश्विना मित्रः सीदन्तु वरुणः । देवासः सर्वया विशा ९

(२७) सप्तविंशं सूक्तम्

(१-६) षड्चस्यास्य सूक्तस्य त्रैवृष्णस्त्र्यरुणः पौरुकुत्स्यस्त्रसदस्युर्भारतोऽश्वमेधश्च
 राजानो भोमौऽत्रिर्वा ऋषिः । (१-५) प्रथमादिपञ्चर्चामग्निः, (६) षष्ठ्याश्चेन्द्राग्नी
 देवते । (१-३) प्रथमतृचस्य त्रिष्टुप् , (४-६) द्वितीयतृचस्य चानुष्टुप् छन्दसी
 अन्रस्वन्ता सत्पतिर्माहे मे गावा चेतिष्ठो असुरो मघोनः ।
 त्रैवृष्णो अग्ने दशभिः सहस्रै वैश्वानर त्र्यरुणश्चिकेत १
 यो मे शता च विंशतिं च गोनां हरीं च युक्ता सुधुरा ददाति ।
 वैश्वानर सुष्टुतो वावृधानो ऽग्ने यच्छ त्र्यरुणाय शर्म २
 एवा ते अग्ने सुमतिं चकानो नविष्ठाय नवमं त्रसदस्युः ।
 यो मे गिरस्तुविजातस्य पूर्वा युक्तेनाभि त्र्यरुणो गृणाति ३
 यो म इति प्रवोच त्वश्वमेधाय सूर्ये ।
 दददृचा सनिं यते ददन्मेधामृतायते ४
 यस्ये मा परुषाः शत मुद्धर्षयन्त्युक्षणः ।
 अश्वमेधस्य दानाः सोमा इव त्र्याशिरः ५
 इन्द्राग्नी शतदाव्यश्वमेधे सुवीर्यम् ।
 क्षत्रं धारयतं बृहद् दिवि सूर्यमिवाजरम् ६

(२८) अष्टाविंशं सूक्तम्

(१-६) षड्चस्यास्य सूक्तस्यात्रेयी विश्ववारा ऋषिका । अग्निर्देवता । (१, ३)
 प्रथमर्चस्तृतीयायाश्च त्रिष्टुप् , (२) द्वितीयाया जगती, (४) चतुर्थ्या अनुष्टुप् ,
 (५-६) पञ्चमीषष्ठ्योश्च गायत्री छन्दांसि

समिद्धो अग्निर्दिवि शोचिरंश्रेत् प्रत्यङ्ङुषसुर्विया वि भाति ।
 एति प्राचीं विश्ववारा नमो भिर्देवाँ ईळाना हविषा घृताचीं १
 समिध्यमानो अमृतस्य राजसि हविष्कृणवन्तं सचसे स्वस्तये ।
 विश्वं स धत्ते द्रविणं यमिन्व स्यातिथ्यमग्ने नि च धत्त इत् पुरः २
 अग्ने शर्ध महते सौभगाय तव द्युमन्युत्तमानि सन्तु ।
 सं जास्पत्यं सुयममा कृणुष्व शत्रूयतामभि तिष्ठा महासि ३
 समिद्धस्य प्रमहसो ऽग्ने वन्दे तव श्रियम् ।
 वृषभो द्युमवाँ असि समध्वरेष्विध्यसे ४
 समिद्धो अग्न आहुत देवान् यक्षि स्वध्वर । त्वं हि हव्यवाळसि ५
 आ जुहोता दुवस्यताऽग्निं प्रयत्यध्वरे । वृणीध्वं हव्यवाहनम् ६

(२६) एकोनत्रिंशं सूक्तम्

(१-१५) पञ्चदशर्चस्यास्य सूक्तस्य शाक्त्यो गौरिवीतिर्ऋषिः । इन्द्रो देवता,
तत्रापि (६) नवम्या ऋचः प्रथमपादस्योशना वा देवता । त्रिष्टुप् छन्दः
त्र्यर्यमा मनुषो देवताता त्री रौचना दिव्या धारयन्त ।
अर्चन्ति त्वा मरुतः पूतदक्षा स्त्वमेषामृषिरिन्द्रासि धीरः १
अनु यदी मरुतो मन्दसान मार्चन्निन्द्रं पपिवांसं सुतस्य ।
आदत्त वज्रमभि यदहिं ह न्नपो यहीरसृजत् सर्तवा उ २
उत ब्रह्माणो मरुतो मे अस्येन्द्रः सोमस्य सुषुतस्य पेयाः ।
तद्धि हव्यं मनुषे गा अविन्द्र दहन्नहिं पपिवाँ इन्द्रो अस्य ३
आद् रोदसी वितरं वि ष्कभायत् संविव्यानश्चिद् भियसें मृगं कः ।
जिर्गर्तिमिन्द्रो अपजर्गुराणः प्रति श्वसन्तमव दानवं हन् ४
अध क्रत्वा मघवन् तुभ्यं देवा अनु विश्वे अददुः सोमपेयम् ।
यत् सूर्यस्य हरितः पतन्तीः पुरः सतीरुपरा एतशे कः ५
नव यदस्य नवतिं च भोगान् त्साकं वज्रेण मघवा विवृश्चत् ।
अर्चन्तीन्द्रं मरुतः सधस्थे त्रैष्टुभेन वचसा बाधत् द्याम् ६
सखा सख्ये अपचत् तूर्यमग्नि रस्य क्रत्वा महिषा त्री शतानि ।
त्री साकमिन्द्रो मनुषः सरासि सुतं इंपबद् वृत्रहत्यायु सोमम् ७
त्री यच्छता महिषाणामघो मा स्त्री सरासि मघवा सोम्यापाः ।
कारं न विश्वे अहन्त देवा भरमिन्द्राय यदहिं जघान ८
उशाना यत् सहस्यैर्इरयातं गृहमिन्द्र जूजुवानेभिरश्वैः ।
वन्वानो अत्र सरथं ययाथ कुत्सेन देवैरवनोर्ह शुष्णम् ९
प्रान्यच्चक्रमवृहः सूर्यस्य कुत्सायान्यद् वरिवो यातवेऽकः ।
अनासो दस्यूरमृणो वधेन नि दुर्योण आवृणइ मध्रवाचः १०
स्तोमासस्त्वा गौरिवीतेरवर्धं न्नरन्धयो वैदथिनायु पिप्रुम् ।
आ त्वामृजिश्वा सख्याय चक्रे पचन् पत्कीरपिबुः सोममस्य ११
नवगवासः सुतसौमास इन्द्रं दशगवासो अभ्यर्चन्त्यकैः ।
गव्यं चिदूर्वमपिधानवन्तं तं चिन्नरः शशमाना अप व्रन् १२
कथो नु ते परि चराणि विद्वान् वीर्या मघवन् या चकर्थ ।
या चो नु नव्या कृणवः शविष्टु प्रेदु ता तै विदथेषु ब्रवाम १३

ए॒ता वि॒श्वा च॒कृ॒वाँ इ॒न्द्र भूर्य॑ प॒रीतो॑ ज॒नुषा॑ वी॒र्येण॑ ।
 या चि॒न्नु व॑ज्रिन् कृ॒णवौ॑ दधृ॒ष्वान् न तै॑ व॒र्ता त॒विष्या॑ अ॒स्ति तस्याः॑ १४
 इन्द्र॑ ब्रह्म॑ क्रि॒यमा॑णा जुष॒स्व या तै॑ श॒विष्ट॑ न॒व्या अ॒कर्म॑ ।
 वस्त्रै॑व भ॒द्रा सु॒कृता॑ व॒सूयू॑ रथं न धी॒रः स्व॒पा अ॒तक्ष॑म् १५

(३०) त्रिंशं सूक्तम्

(१-१५) पञ्चदशर्चस्यास्य सूक्तस्यात्रेयो वभुर्ऋषिः । (१-११)

प्रथमाद्येकादशर्चामिन्द्रः, (१२-१५) द्वादश्यादिचतसृणाञ्च ऋणञ्चयेन्द्रौ देवते ।

त्रिष्टुप् छन्दः

क्व॑श्स्य वी॒रः को॑ अ॒पश्य॑दिन्द्रं सु॒खर॑थमी॒र्यमा॑नं ह॒रिभ्या॑म् ।
 यो रा॒या व॒ज्री सु॒तसौ॑मि॒च्छन् तदो॑को ग॒न्ता पुरु॑हू॒त ऊ॒ती १
 अ॒वाच॑चक्षं प॒दमे॑स्य स॒स्व रु॒ग्रं नि॒धातु॑र॒न्वाय॑मि॒च्छन् ।
 अ॒पृच्छ॑म॒न्याँ उ॒त ते म॑ आ॒हु रि॒न्द्रं नरो॑ बु॒बुधा॑ना अ॒शेम २
 प्र नु॑ व॒यं सु॒ते या तै॑ कृ॒तानी॑न्द्र ब्र॒वाम॑ या॒नि नो॒ जुजो॑षः ।
 वे॒द॒दवि॑द्वाञ्छृ॒णव॑च्च वि॒द्वान् वह॑तेऽयं म॒घवा॑ सर्व॒सेनः॑ ३
 स्थि॒रं म॒नश्च॑कृ॒षे जा॒त इ॒न्द्र वेषी॑दे॒को यु॒धये॑ भूर्य॑सश्चित् ।
 अ॒श्मानं॑ चि॒च्छव॑सा दि॒द्युतो॑ वि वि॒दो ग॒वा॒मूर्व॑मु॒स्त्रिया॑णाम् ४
 प॒रो यत् त्वं प॑र॒म आ॒जनि॑ष्ठाः प॒राव॑ति श्रु॒त्यं नाम॑ बिभ्रत् ।
 अ॒तश्चि॑दिन्द्रा॒दभ॑यन्त दे॒वा वि॒श्वा अपो॑ अ॒जय॑द् दा॒सप॑त्नीः ५
 तु॒भ्येदे॑ते म॒रुतः॑ सु॒शेवा॑ अ॒र्चन्त्य॑र्कं सु॒न्वन्त्य॑न्धः ।
 अ॒हि॒मो॒हान॑म॒प आ॒शया॑नं प्र मा॒याभि॑र्मा॒यिनं॑ स॒क्षदि॑न्द्रः ६
 वि षू॑ मृ॒धौ ज॒नुषा॑ दान॒मिन्व॑न्न॒हन् ग॒वा म॑घवन् त्सं॒चका॑नः ।
 अ॒त्रा दा॑सस्य न॒मुचेः॑ शि॒रो य॒दव॑र्तयो म॒नवे॑ गा॒तुमि॑च्छन् ७
 यु॒जं हि॑ मा॒मकृ॑था आ॒दिदि॑न्द्र शि॒रो दा॑सस्य न॒मुचे॑र्म॒थाय॑न् ।
 अ॒श्मानं॑ चि॒त् स्वर्य॑श् वर्त॒मानं॑ प्र च॒क्रिये॑व रो॒दसी॑ म॒रुद्भ्यः॑ ८
 स्त्रि॒यो हि॑ दा॒स आ॒यु॑धानि च॒क्रे किं॑ मां कर॒न्नब॑ला अ॒स्य से॒नाः ।
 अ॒न्तर्ह्य॑ख्यदु॒भे अ॒स्य धे॒ने अ॒थोप॑ प्रैद् यु॒धये॑ दस्यु॒मिन्द्रः॑ ९
 स॒मत्र॑ गा॒वोऽभि॑तौऽन॒वन्ते॒ हेह॑ व॒त्सैर्वि॑यु॒ता यदा॑सन् ।
 सं ता॑ इन्द्रौ अ॒सृज॑दस्य शा॒कै र्य॑दीं सो॒मासः॑ सु॒षुता॑ अ॒मन्द॑न् १०
 यदीं॑ सो॒मा ब॒भ्रुधू॑ता अ॒मन्द॑न्न॒रौर॑वीद् वृ॒षभः॑ सा॒दने॑षु ।

पुरंदरः पपिवाँ इन्द्रो अस्य पुनर्गवामददादुस्त्रियाणाम् ११
भद्रमिदं रुशमा अग्रे अक्रन् गवां चत्वारि ददतः सहस्रा ।
ऋणंचयस्य प्रयता मघानि प्रत्यग्रभीष्म नृतमस्य नृणाम् १२
सुपेशंसं माव सृजन्त्यस्तं गवां सहस्रै रुशमासो अग्रे ।
तीव्रा इन्द्रममन्दुः सुतासो ऽक्तोर्व्युष्टौ परितक्यायाः १३
औच्छत् सा रात्री परितक्या याँ ऋणंचये राजनि रुशमानाम् ।
अत्यो न वाजी रघुरज्यमानो बभ्रुश्चत्वार्यसनत् सहस्रा १४
चतुःसहस्रं गव्यस्य पश्वः प्रत्यग्रभीष्म रुशमेष्वग्रे ।
घर्मश्चित् तप्तः प्रवृजे य आसी दयस्मयस्तम्वादां विप्राः १५

(३१) एकत्रिंशं सूक्तम्

(१-१३) त्रयोदशर्चस्यास्य सूक्तस्यात्रेय अवस्युर्ऋषिः । (१-७, ८, १०-१३)

प्रथमादिसप्तर्चामष्टम्याः प्रथमद्वितीयपादयोर्दशम्यादिचतसृणाञ्चेन्द्रः (८)

अष्टम्यास्तृतीयपादस्येन्द्रः कुत्सो वा, चतुर्थपादस्येन्द्र उशना वा, (९)

नवम्याश्चेन्द्राकुत्सौ देवताः । त्रिष्टुप् छन्दः

इन्द्रो रथाय प्रवर्त कृणोति यमध्यस्थान्मघवा वाजयन्तम् ।
यूथेव पश्वो व्युनोति गोपा अरिष्टो याति प्रथमः सिषासन् १
आ प्र द्रव हरिवो मा वि वैनुः पिशङ्गराते अभि नः सचस्व ।
नहि त्वदिन्द्र वस्यो अन्यदस्त्य मेनाँश्चिज्जनिवतश्चकर्थ २
उद्यत् सहः सहस्र आर्जनिष्ट देदिष्ट इन्द्र इन्द्रियाणि विश्वा ।
प्राचौदयत् सुदुघा वृत्रे अन्तर्वि ज्योतिषा संववृत्वत् तमोऽवः ३
अनवस्ते रथमश्वाय तक्षन् त्वष्टा वज्रं पुरुहूत द्युमन्तम् ।
ब्रह्माण इन्द्रं महयन्तो अकै रवर्धयन्नहये हन्तवा उ ४
वृष्णे यत् ते वृषणो अर्कमर्चा निन्द्र गावाणो अदितिः सजोषाः ।
अनश्वासो ये पवयोऽरथा इन्द्रैषिता अभ्यवर्तन्त दस्यून् ५
प्र ते पूर्वाणि करणानि वोचं प्र नूतना मघवन् या चकर्थ ।
शक्तीवो यद् विभरा रोदसी उभे जयन्नपो मनवे दानुचित्राः ६
तदिन्नु ते करणं दस्म विप्रा ऽहिं यद् घ्नन्नोजो अत्रामिमीथाः ।
शुष्णास्य चित् परि माया अगृह्णाः प्रपित्वं यन्नपु दस्यूरसेधः ७

त्वमपो यदेवे तुर्वशायाऽरमयः सुदुघाः पार इन्द्र ।
 उग्रमयातमवहो ह कुत्सं सं ह यद् वामुशनारन्त देवाः ८
 इन्द्राकुत्सा वहमाना रथेनाऽऽ वामत्या अपि कर्णं वहन्तु ।
 निः षीमद्भ्यो धर्मथो निः षधस्थान् मघोनो हदो वरथस्तर्मासि ९
 वार्तस्य युक्तान् त्सुयुजश्चिदश्वान् कविश्चिदेषो अजगन्नवस्युः ।
 विश्वे ते अत्र मरुतः सखायु इन्द्र ब्रह्माणि तविषीमवर्धन् १०
 सूरश्चिद् रथं परितक्म्यायां पूर्वं करदुपरं जूजुवांसम् ।
 भरश्चक्रमेतशः सं रिणाति पुरो दधत् सनिष्यति क्रतुं नः ११
 आयं जना अभिचक्षै जगामेन्द्रः सखायं सुतसोममिच्छन् ।
 वदन् ग्रावाव वेदिं इभ्रयाते यस्य जीरमध्वर्यवश्चरन्ति १२
 ये चाकनन्त चाकनन्त नू ते मर्ता अमृत मो ते अह आरन् ।
 वावन्धि यज्यूरुत तेषु धेह्यो जो जनेषु येषु ते स्याम १३

(३२) द्वात्रिंशं सूक्तम्

(१-१२) द्वादशर्चस्यास्य सूक्तस्यात्रेयो गातुर्ऋषिः । इन्द्रो देवता । त्रिष्टुप् छन्दः
 अर्दरुत्समसृजो वि खानि त्वमर्णवान् बद्धधानाँ अरम्णाः ।
 महान्तमिन्द्र पर्वतं वि यद् वः सृजो वि धारा अव दानवं हन् १
 त्वमुत्साँ ऋतुभिर्बद्धधानाँ अरह ऊधः पर्वतस्य वज्रिन् ।
 अहिं चिदुग्र प्रयुतं शयानं जघन्वाँ इन्द्र तविषीमधत्थाः २
 त्यस्य चिन्महतो निर्मृगस्य वर्धर्जघान् तविषीभिरिन्द्रः ।
 य एक इदप्रतिर्मन्यमान् आदस्मादन्यो अजनिष्ट तव्यान् ३
 त्यं चिदेषां स्वधया मदन्तं इमहो नपातं सुवृधं तमोगाम् ।
 वर्षप्रभर्मा दानवस्य भामं वज्रेण वज्री नि जघान् शुष्णाम् ४
 त्यं चिदस्य क्रतुभिर्निषत्तम मर्मणो विददिदस्य मर्म ।
 यदीं सुक्षत्र प्रभृता मदस्य युयुत्सन्तं तमसि हर्म्ये धाः ५
 त्यं चिदित्था कत्पयं शयानमसूर्ये तमसि वावृधानम् ।
 तं चिन्मन्दानो वृषभः सुतस्यो चैरिन्द्रो अपगूर्या जघान ६
 उद् यदिन्द्रो महते दानवायु वर्धर्यमिष्ट सहो अप्रतीतम् ।
 यदीं वज्रस्य प्रभृतौ ददाभु विश्वस्य जन्तोरधमं चकार ७
 त्यं चिदर्णं मधुपं शयान मसिन्वं व्रं मह्यादुग्रः ।

अपादमत्रं महता वधेन नि दुर्योण आवृणइ मध्रवाचम् ८
को अस्य शुष्मं तविषीं वरात् एको धना भरते अप्रतीतः ।
इमे चिदस्य जयसो नु देवी इन्द्रस्यौजसो भियसा जिहाते ९
न्यस्मै देवी स्वधितिर्जिहीत् इन्द्राय गातुरुशतीव येमे ।
सं यदोजो युवते विश्वमाभिरनु स्वधानै जितयो नमन्त १०
एकं नु त्वा सत्पतिं पाञ्चजन्यं जातं शृणोमि यशसं जनैषु ।
तं मै जगृभ्र आशसो नविष्टं दोषा वस्तोर्हवमानास इन्द्रम् ११
एवा हि त्वामृतुथा यातयन्तं मघा विप्रैभ्यो ददतं शृणोमि ।
किं ते ब्रह्माणो गृहते सखायो ये त्वाया निदधुः काममिन्द्र १२
द्वितीयोऽध्यायः ।

। व० १ । २८

तृतीयोऽनुवाकः

। सू० ३३-४४

(३३) त्रयस्त्रिंशं सूक्तम्

(१-१०) दशर्चस्यास्य सूक्तस्य प्राजापत्यः संवरण ऋषिः । इन्द्रो देवता ।

त्रिष्टुप् छन्दः

महिं महे तवसे दीध्ये नृ निन्द्रायेत्था तवसे अतव्यान् ।
यो अस्मै सुमतिं वाजसातौ स्तुतो जनै समुर्यश्चिकेत १
स त्वं न इन्द्र धियसानो अकैर्हरीणां वृषन् योक्त्रमश्रेः ।
या इत्था मघवन्ननु जोषं वक्षौ अभि प्रार्यः सन्नि जनान् २
न ते त इन्द्राभ्यस्मदृष्वाऽयुक्तासो अब्रह्मता यदसन् ।
तिष्ठा रथमधि तं वज्रहस्ता ऽऽरश्मिं देव यमसे स्वश्वः ३
पुरू यत् त इन्द्र सन्त्युक्था गर्वे चकथोर्वरासु युध्यन् ।
ततक्षे सूर्याय चिदोर्कसि स्वे वृषा समत्सु दासस्य नाम चित् ४
वयं ते त इन्द्र ये च नरः शर्धो जज्ञाना याताश्च रथाः ।
आस्माञ्जगम्यादहिशुष्म सत्वा भगो न हव्यः प्रभृथेषु चारुः ५
पृक्षेणयमिन्द्र त्वे ह्योजो नृम्णानि च नृतमानो अमर्तः ।
स न एनी वसवानो रयिं दाः प्रार्यः स्तुषे तुविमघस्य दानम् ६
एवा न इन्द्रोतिभिरव पाहि गृणतः शूर कारून् ।

उत त्वचं ददतो वाजसातौ पिप्रीहि मध्वः सुषुतस्य चारौः ७
 उत त्वे मां पौरुकुत्स्यस्य सूरे स्त्रसदस्योर्हिरगिनो रराणाः ।
 वहन्तु मा दश श्येतासो अस्य गैरिन्नितस्य क्रतुभिर्नु संश्वे ८
 उत त्वे मां मारुताश्वस्य शोणाः क्रत्वामघासो विदथस्य रातौ ।
 सहस्रा मे च्यवतानो ददान आनूकमर्यो वपुषे नार्चत् ९
 उत त्वे मां ध्वन्यस्य जुष्टा लक्ष्मणस्य सुरुचो यतानाः ।
 म्हा रायः संवरणस्य ऋषेर्व्रजं न गावः प्रयता अपि गमन् १०

(३४) चतुस्त्रिंशं सूक्तम्

(१-६) नवर्चस्यास्य सूक्तस्य प्राजापत्यः संवरण ऋषिः । इन्द्रो देवता । (१-८)

प्रथमाद्यष्टर्चा जगती (६) नवम्याश्च त्रिष्टुप् छन्दसी

अजातशत्रुमजरा स्वर्व त्यनु स्वधामिता दस्ममीयते ।
 सुनोतन् पचत् ब्रह्मवाहसे पुरुष्टताय प्रतरं दधातन १
 आ यः सोमै न जठरमपिप्रता ऽमन्दत मघवा मध्वो अन्धसः ।
 यदी मृगाय हन्तवे महावधः सहस्रभृष्टिमुशना वधं यमत् २
 यो अस्मै घंस उत वा य ऊर्धनि सोमं सुनोति भवति द्युमाँ अह ।
 अपाप शक्रस्ततनुष्टिमूहति तनूशुभ्रं मघवा यः कवासखः ३
 यस्यावधीत् पितरं यस्य मातरं यस्य शक्रो भ्रातरं नात ईषते ।
 वेतीद्वस्य प्रयता यतंकरो न किल्बिषादीषते वस्व आक्रः ४
 न पञ्चभिर्दशभिर्वष्टचारभं नासुन्वता सचते पुष्यता चन ।
 जिनाति वेदमुया हन्ति वा धुनि रा देवयुं भजति गोमति वृजे ५
 वित्वक्ष्णः समृतौ चक्रमासजो ऽसुन्वतो विषुणः सुन्वतो वृधः ।
 इन्द्रो विश्वस्य दमिता विभीषणो यथावशं नयति दासमार्यः ६
 समी पणेरजति भोजनं मुषे वि दाशुषे भजति सूनरं वसु ।
 दुर्गे चन धियते विश्व आ पुरु जनो यो अस्य तर्विषीमचुकुधत् ७
 सं यजनौ सुधनौ विश्वशर्धसाव वेदिन्द्रो मघवा गोषु शभिषु ।
 युजं ह्यन्यमकृत प्रवेप न्युदीं गव्यं सृजते सत्वभिर्धुनिः ८
 सहस्रसामाग्निवेशिं गृणीषे शत्रिमग्न उपमां केतुमर्यः ।
 तस्मा आपः संयतः पीपयन्त तस्मिन् क्षत्रममवत् त्वेषमस्तु ९

(३५) पञ्चत्रिंशं सूक्तम्

(१-८) अष्टर्चस्यास्य सूक्तस्याङ्गिरसः प्रभूवसुर्ऋषिः । इन्द्रो देवता । (१-७)
 प्रथमादिसप्तर्चामनुष्टुप् , (८) अष्टम्याश्च पङ्क्तिश्छन्दसी
 यस्ते साधिष्ठोऽवस इन्द्र क्रतुष्टमा भर ।
 अस्मभ्यं चर्षणीसहं सस्त्रिं वाजेषु दुष्टरम् १
 यदिन्द्र ते चतस्रो यच्छूर सन्ति तिस्रः ।
 यद् वा पञ्च क्षितीना मवस्तत् सु न आ भर २
 आ तेऽवो वरेण्यं वृषन्तमस्य हूमहे ।
 वृषजूतिर्हि जज्ञिष आभूभिरिन्द्र तुर्वणिः ३
 वृषा ह्यसि राधसे जज्ञिषे वृष्णि ते शर्वः ।
 स्वक्षत्रं ते धृषन्मनः सत्राहमिन्द्र पौंस्यम् ४
 त्वं तमिन्द्र मर्त्यं ममित्रयन्तमद्रिवः ।
 सर्वरथा शतक्रतो नि याहि शवसस्पते ५
 त्वामिद् वृत्रहन्तम् जनासो वृक्तबर्हिषः ।
 उग्रं पूर्वीषु पूर्व्यं हवन्ते वाजसातये ६
 अस्माकमिन्द्र दुष्टरं पुरोयावानमाजिषु ।
 सयावानं धनैधने वाजयन्तमवा रथम् ७
 अस्माकमिन्द्रेहि नो रथमवा पुरंध्या ।
 वयं शविष्ठ वार्यं दिवि श्रवो दधीमहि दिवि स्तोमं मनामहे ८

(३६) षट्त्रिंशं सूक्तम्

(१-६) षड्चस्यास्य सूक्तस्याङ्गिरसः प्रभूवसुर्ऋषिः । इन्द्रो देवता । (१-२, ४-

६) प्रथमाद्वितीययोर्ऋचोश्चतुर्थ्यादितृचस्य च त्रिष्टुप् ,

(३) तृतीयायाश्च जगती छन्दसी

स आ गमदिन्द्रो यो वसूनां चिकैतद् दातुं दामनो रयीणाम् ।
 धन्वचरो न वंसगस्तृषाणश्चकमानः पिबतु दुग्धमंशुम् १
 आ ते हनू हरिवः शूर शिप्रे रुहत् सोमो न पर्वतस्य पृष्ठे ।
 अनु त्वा राजन्नर्वतो न हिन्वन् गीर्भिर्मदेम पुरुहूत् विश्वे २
 चक्रं न वृत्तं पुरुहूत् वेपते मनो भिया मे अमतेरिदद्रिवः ।
 रथादधि त्वा जरिता सदावृध कुविन्नु स्तोषन्मघवन् पुरुवसुः ३
 एष ग्रावेव जरिता त इन्द्रे यतिं वाचं बृहदाशुषाणः ।

प्र सव्येन मघवन् यंसि रायः प्र दक्षिणिद्धरिवो मा वि वैनः ४
 वृषा त्वा वृषणं वर्धतु द्यौर्वृषा वृषभ्यां वहसे हरिभ्याम् ।
 स नो वृषा वृषरथः सुशिप्र वृषक्रतो वृषा वज्रिन् भरै धाः ५
 यो रोहितौ वाजिनौ वाजिनीवान् त्रिभिः शतैः सचमानावदिष्ट ।
 यूने समस्मै क्षितयो नमन्तां श्रुतरथाय मरुतो दुवोया ६

(३७) सप्तत्रिंशं सूक्तम्

(१-५) पञ्चर्चस्यास्य सूक्तस्य भौमोऽत्रिर्ऋषिः । इन्द्रो देवता । त्रिष्टुप् छन्दः
 सं भानुना यतते सूर्यस्याऽऽजुह्वानो घृतपृष्ठः स्वञ्चाः ।
 तस्मा अमृधा उषसो व्युच्छान् य इन्द्राय सुनवामेत्याह १
 समिद्धाग्निर्वनवत् स्तीर्णबर्हि र्युक्तग्रावा सुतसौमो जराते ।
 ग्रावाणो यस्यैषिरं वदन्त्य यदध्वर्युर्हविषाव सिन्धुम् २
 वधूरियं पतिमिच्छन्त्येति य ई वहति महिषीमिषिराम् ।
 आस्य श्रवस्याद् रथ आ च घोषात् पुरू सहस्रा परि वर्तयाते ३
 न स राजा व्यथते यस्मिन्निन्द्र स्तीव्रं सोमं इंपबति गोसखायम् ।
 आ सत्वनैरजति हन्ति वृत्रं क्षेति क्षितीः सुभगो नाम पुष्यन् ४
 पुष्यात् क्षेमै अभि योगे भवा त्युभे वृतौ संयती सं जयाति ।
 प्रियः सूर्ये प्रियो अग्रा भवाति य इन्द्राय सुतसौमो ददाशत् ५

(३८) अष्टात्रिंशं सूक्तम्

(१-५) पञ्चर्चस्यास्य सूक्तस्य भौमोऽत्रिर्ऋषिः । इन्द्रो देवता । अनुष्टुप् छन्दः
 उरोष्ट इन्द्र राधसो विभ्वी रातिः शतक्रतो ।
 अधा नो विश्वचर्षणे द्युम्ना सुक्षत्र मंहय १
 यदीमिन्द्र श्रवाय्य मिषं शविष्ठ दधिषे ।
 पप्रथे दीर्घश्रुत्तमं हिरण्यवर्णं दुष्टरम् २
 शुष्मासो ये तै अद्रिवो मेहना केतसापः ।
 उभा देवावभिष्टये दिवश्च गमश्च राजथः ३
 उतो नो अस्य कस्य चिद् दक्षस्य तव वृत्रहन् ।
 अस्मभ्यं नृणामा भराऽस्मभ्यं नृणस्यसे ४
 नू त आभिरभिष्टिभिस्तव शर्मञ्छतक्रतो ।

इन्द्र स्याम सुगोपाः शूर स्याम सुगोपाः ५

(३६) एकोनचत्वारिंशं सूक्तम्

(१-५) पञ्चर्चस्यास्य सूक्तस्य भौमोऽत्रिर्ऋषिः । इन्द्रो देवता । (१-४)

प्रथमादिचतुर्ऋचामनुष्टुप् , (५) पञ्चम्याश्च पङ्क्तिश्छन्दसी

यदिन्द्र चित्र मेहना ऽस्ति त्वादातमद्रिवः ।

राधस्तन्नो विदद्वस उभयाहस्त्या भर १

यन्मन्यसे वरेण्य मिन्द्र द्युक्षं तदा भर ।

विद्याम् तस्य ते वय मर्कूपारस्य दावने २

यत् ते दित्सु प्राध्यं मनो अस्ति श्रुतं बृहत् ।

तेन दृळ्हा चिदद्रिव आ वाजं दर्षि सातये ३

मंहिष्ठं वो मुघोनां राजानं चर्षणीनाम् ।

इन्द्रमुप प्रशस्तये पूर्वीभिर्जुषे गिरः ४

अस्मा इत् काव्यं वच उक्थमिन्द्राय शंस्यम् ।

तस्मा उ ब्रह्मवाहसे गिरौ वर्धन्त्यत्रयो गिरः शुम्भन्त्यत्रयः ५

(४०) चत्वारिंशं सूक्तम्

(१-६) नवर्चस्यास्य सूक्तस्य भौमोऽत्रिर्ऋषिः । (१-४) प्रथमादिचतुर्ऋचामिन्द्रः

(५) पञ्चम्याः सूर्यः (६-६) षष्ठ्यादिचतसृणाञ्चात्रिर्देवताः । (१-३)

प्रथमादितृचस्योष्णिक्, (४, ६-८) चतुर्थ्याः षष्ठ्यादितृचस्य च त्रिष्टुप् , (५, ६)

पञ्चमीनवम्योश्चानुष्टुप् छन्दांसि

आ याह्यद्रिभिः सुतं सोमं सोमपते पिब । वृषन्निन्द्र वृषभिर्वृत्रहन्तम् १

वृषा ग्रावा वृषा मदो वृषा सोमो अयं सुतः । वृषन्निन्द्र वृषभिर्वृत्रहन्तम् २

वृषा त्वा वृषणं हुवे वज्रिञ्चित्राभिरूतिभिः । वृषन्निन्द्र वृषभिर्वृत्रहन्तम् ३

ऋजीषी वृजी वृषभस्तराषाट्छुष्मी राजा वृत्रहा सौमपावा ।

युक्त्वा हरिभ्यामुप यासदवाइ माध्यन्दिने सर्वने मत्सदिन्द्रः ४

यत् त्वा सूर्यं स्वर्भानु स्तमसाविध्यदासुरः ।

अक्षेत्रविद् यथा मुग्धो भुवनान्यदीधयुः ५

स्वर्भानोरध यदिन्द्र माया अवो दिवो वर्तमाना अवाहन् ।

गूळहं सूर्यं तमसापव्रतेन तुरीयेण ब्रह्मणाविन्ददत्रिः ६

मा मामिमं तव सन्तमत्र इरस्या द्रुग्धो भियसा नि गारीत् ।
 त्वं इमत्रो असि सत्यराधास्तौ मेहावतं वरुणश्च राजा ७
 ग्राव्णौ ब्रह्मा युयुजानः संपर्यन् कीरिणा देवान् नमसोपशिक्तन् ।
 अत्रिः सूर्यस्य दिवि चक्षुराधात् स्वर्भानोरप माया अघुक्तत् ८
 यं वै सूर्यं स्वर्भानु स्तमसाविध्यदासुरः ।
 अत्रयस्तमन्वविन्दन् नह्यश्न्ये अशक्नुवन् ९

(४१) एकचत्वारिंशं सूक्तम्

(१-२०) विंशत्यृचस्यास्य सूक्तस्य भौमोऽत्रिर्ऋषिः । विश्वे देवा देवताः । (१-

१५, १८-१९) प्रथमादिपञ्चदशार्चामष्टादशयेकोनविंशोश्च त्रिष्टुप् , (१६-१७)

षोडशीसप्तदशयोरतिजगती, (२०) विंश्याश्चैकपदा विराट् छन्दांसि

को नु वा इमत्रावरुणावृतायन् दिवो वा महः पार्थिवस्य वा दे ।
 अतस्य वा सदसि त्रासीथां नो यज्ञायते वा पशषो न वाजान् १
 ते नो मित्रो वरुणो अर्यमायु रिन्द्रं ऋभुक्षा मरुतो जुषन्त ।
 नमोभिर्वा ये दधते सुवृक्तिं स्तोमं रुद्राय मीळ्हुषै सजोषाः २
 आ वां येष्ठाश्विना हुवध्यै वातस्य पत्नन् रथ्यस्य पुष्टौ ।
 उत वा दिवो असुराय मन्म प्रान्धासीव यज्यवे भरध्वम् ३
 प्र सक्ष्णौ दिव्यः कण्वहोता त्रितो दिवः सजोषा वातो अग्निः ।
 पूषा भगः प्रभृथे विश्वभोजा आजिं न जग्मुराश्वश्चतमाः ४
 प्र वो रयिं युक्ताश्च भरध्वं राय एषेऽवसे दधीत् धीः ।
 सुशेव एवैरौशिजस्य होता ये व एवा मरुतस्तुराणाम् ५
 प्र वो वायुं रथयुजं कृणुध्वं प्र देवं विप्रं पनितारमर्कैः ।
 इषुध्यव ऋतसापुः पुरंधीर्वस्वीर्नो अत्र पत्नीरा धिये धुः ६
 उपे व एषे वन्द्यैभिः शूषैः प्र यही दिवश्चितयद्भिरकैः ।
 उषासानक्ता विदुषीव विश्व मा हा वहतो मर्त्याय यज्ञम् ७
 अभि वो अर्चे पोष्यावतो नृन् वास्तोष्पतिं त्वष्टारं रराणः ।
 धन्या सजोषा धिषणा नमोभिर्वनस्पतीरौषधी राय एषे ८
 तुजे नस्तने पर्वताः सन्तु स्वैतवो ये वसवो न वीराः ।
 पनित आप्तयो यजतः सदा नो वर्धान्नः शंसं नयो अभिष्टौ ९
 वृष्णो अस्तोषि भूम्यस्य गर्भं त्रितो नपातमुपां सुवृक्ति ।

गृणीते अग्निरेतरी न शूषैः शोचिष्केशो नि रिणाति वना १०
 कथा महे रुद्रियाय ब्रवाम् कद् राये चिकितुषे भगाय ।
 आप ओषधीरुत नोऽवन्तु द्यौरवना गिरयो वृक्षकेशाः ११
 शृणोतु न ऊर्जा पतिर्गिरः स नभुस्तरियाँ इषिरः परिज्मा ।
 शृगवन्त्वापः पुरो न शुभ्राः परि स्रुचौ बबृहाणस्याद्रैः १२
 विदा चिन्नु महान्तो ये व एवा ब्रवाम दस्मा वार्य दधानाः ।
 वयश्चन सुभ्वश् आर्व यन्ति क्षुभा मर्तमनुयतं वधस्रैः १३
 आ दैव्यानि पार्थिवानि जन्मा ऽपश्चाच्छा सुमखाय वोचम् ।
 वर्धन्तां द्यावो गिरश्चन्द्राग्रा उदा वर्धन्तामभिषाता अर्णाः १४
 पदेपदे मे जरिमा नि धायि वरूत्री वा शक्रा या पायुभिश्च ।
 सिषक्तु माता मही रसा नः स्मत् सूरिभिर्ऋजुहस्तं ऋजुवनिः १५
 कथा दाशेम नर्मसा सुदानू नेवया मरुतो अच्छौक्तौ प्रश्रवसो मरुतो
 अच्छौक्तौ ।
 मा नोऽहिर्बुध्यो रिषे धा दस्माकं भूदुपमातिवनिः १६
 इति चिन्नु प्रजायै पशुमत्यै देवासो वनते मर्त्यो व आ देवासो वनते मर्त्यो
 वः ।
 अत्रां शिवां तन्वो धासिमस्या जरां चिन्मे निर्ऋतिर्जग्रसीत १७
 तां वो देवाः सुमतिमूर्जयन्ती मिषमश्याम वसवः शसा गोः ।
 सा नः सुदानुर्मृळयन्ती देवी प्रति द्रवन्ती सुविताय गम्याः १८
 अभि न इळा यूथस्य माता स्मन्नदीभिर्ऋर्वशी वा गृणातु ।
 उर्वशी वा बृहद्विवा गृणाना ऽभ्यूर्वाना प्रभृथस्यायोः १९
 सिषक्तु न ऊर्जव्यस्य पुष्टेः २०

(४२) द्विचत्वारिंशं सूक्तम्

(१-१८) अष्टादशर्चस्यास्य सूक्तस्य भौमोऽत्रिर्ऋषिः । (१-१०, १२-१८)
 प्रथमादिदशर्चा द्वादश्यादिसप्तानाञ्च विश्वे देवाः, (११) एकादश्याश्च रुद्रो देवताः ।
 (१-१६, १८) प्रथमादिषोडशर्चामष्टादश्याश्च त्रिष्टुप्,
 (१७) सप्तदश्याश्चैकपदा विराट् छन्दसी
 प्र शन्तमा वरुणं दीर्घिती गी मित्रं भगमदिति नूनमश्याः ।
 पृषद्योनिः पञ्चहोता शृणोत्व तूर्तपन्था असुरो मयोभुः १

प्रति मे स्तोममदितिर्जगृभ्यात् सूनुं न माता हृद्यं सुशेवम् ।
 ब्रह्मं प्रियं देवहितं यदस्त्यहं इमत्रे वरुणे यन्मयोभु २
 उदीरय कवितमं कवीना मुनतैनमभि मध्वा घृतेन ।
 स नो वसूनि प्रयता हितानि चन्द्राणि देवः सविता सुवाति ३
 समिन्द्र णो मनसा नेषि गोभिः सं सूरिभिर्हरिवः सं स्वस्ति ।
 सं ब्रह्मणा देवहितं यदस्ति सं देवानां सुमत्या यज्ञियानाम् ४
 देवो भर्गः सविता रायो अंश इन्द्रो वृत्रस्य संजितो धनानाम् ।
 ऋभुक्षा वाज उत वा पुरंधि रवन्तु नो अमृतासस्तुरासः ५
 मरुत्वतो अप्रतीतस्य जिष्णो रजूर्यतः प्र ब्रवामा कृतानि ।
 न ते पूर्वे मघवन् नापरासो न वीर्यं नूतनः कश्चनाप ६
 उप स्तुहि प्रथमं रत्नधेयं बृहस्पतिं सनितारं धनानाम् ।
 यः शंसते स्तुवते शंभविष्ठः पुरुवसुरागमज्जोहुवानम् ७
 तवोतिभिः सचमाना अरिष्टा बृहस्पते मघवानः सुवीराः ।
 ये अश्वदा उत वा सन्ति गोदा ये वस्त्रदाः सुभगास्तेषु रायः ८
 विसर्माणं कृणुहि वित्तमेषां ये भुञ्जते अपृणन्तो न उक्थैः ।
 अपव्रतान् प्रसवे वावृधानान् ब्रह्मद्विषः सूर्याद् यावयस्व ९
 य ओहते रक्षसो देववीता वचक्रेभिस्तं मरुतो नि यात ।
 यो वः शमीं शशमानस्य निन्दात् तुच्छ्यान् कामान् करते सिष्विदानः १०
 तमुष्टुहि यः स्विषुः सुधन्वा यो विश्वस्य क्षयति भेषजस्य ।
 यद्वर्वा महे सौमनसार्य रुद्रं नमोभिर्देवमसुरं दुवस्य ११
 दमूनसो अपसो ये सुहस्ता वृष्णः पत्नीर्नद्यौ विभवतृष्टाः ।
 सरस्वती बृहद्विबोत राका दशस्यन्तीर्वरिवस्यन्तु शभ्राः १२
 प्र सू महे सुशरणाय मेधां गिरं भरे नव्यसीं जायमानाम् ।
 य आहना दुहितुर्वक्षणासु रूपा मिनानो अकृणोदिदं नः १३
 प्र सुष्टतिः स्तनयन्तं रुवन्तं मिळस्पतिं जरितर्नूनमश्याः ।
 यो अब्दिमाँ उदनिमाँ इयति प्र विद्युता रोदसी उक्षमाणः १४
 एषः स्तोमो मारुतं शर्धो अच्छा रुद्रस्य सूनुँयुवन्यूरुदश्याः ।
 कामो राये हवते मा स्वस्त्युप स्तुहि पृषदश्वाँ अयासः १५
 प्रैषः स्तोमः पृथिवीमन्तरिक्षं वनस्पतीरोषधी राये अश्याः ।
 देवोदेवः सुहवो भूतु मह्यं मा नो माता पृथिवी दुर्मतौ धात् १६

उरौ दैवा अनिबाधे स्याम १७

समश्विनोरवसा नूतनेन मयोभुवा सुप्रणीती गमेम ।

आ नो रयिं वहतमोत वीराना विश्वान्यमृता सौभंगानि १८

(४३) त्रिचत्वारिंशं सूक्तम्

(१-१७) सप्तदशर्चस्यास्य सूक्तस्य भौमोऽत्रिर्ऋषिः । विश्वे देवा देवताः । (१-

१५, १७) प्रथमादिपञ्चदशर्चा सप्तदश्याश्च त्रिष्टुप् ,

(१६) षोडश्याश्चैकपदा विराट् छन्दसी

आ धेनवः पर्यसा तूर्यर्था अर्मर्धन्तीरुपे नो यन्तु मध्वा ।

महो राये बृहतीः सप्त विप्रौ मयोभुवौ जरिता जौहवीति १

आ सुष्टुती नमसा वर्तयध्वै द्यावा वाजाय पृथिवी अर्मधे ।

पिता माता मधुवचाः सुहस्ता भरभरे नो यशसावविष्टाम् २

अध्वर्यवश्चकृवांसो मधूनि प्र वायवे भरत चारु शक्रम् ।

होतैव नः प्रथमः पाह्यस्य देव मध्वो ररिमा ते मदाय ३

दश क्षिपौ युञ्जते ब्राह्म अद्रिं सोमस्य या शमितारा सुहस्ता ।

मध्वो रसं सुगर्भस्तिर्गिरिष्ठां चनिश्चदद् दुदुहे शक्रमंशः ४

असावि ते जुजुषाणाय सोमः क्रत्वे दक्षाय बृहते मदाय ।

हरी रथे सुधुरा योगै अर्वा गिन्द्र प्रिया कृणुहि हूयमानः ५

आ नो महीमरमतिं सजोषा ग्रां देवीं नमसा रातहव्याम् ।

मधोर्मदाय बृहतीमृतज्ञा माग्रे वह पृथिभिर्देवयानैः ६

अञ्जन्ति यं प्रथयन्तो न विप्रा वृपावन्तं नाग्निना तपन्तः ।

पितुर्न पुत्र उपसि प्रेष्ठ आ घर्मो अग्निमृतयन्नसादि ७

अच्छा मही बृहती शन्तमा गी दूतो न गन्त्वश्विना हुवध्वै ।

मयोभुवा सरथा यातमर्वा गगन्तं निधिं धुरमाणिर्न नाभिम् ८

प्र तव्यसो नमउक्तिं तुरस्याऽहं पूष्ण उत वायोरदिक्षि ।

या राधसा चोदितारा मतीनां या वाजस्य द्रविणोदा उत त्मन् ९

आ नामभिर्मरुतो वक्षि विश्वा ना रूपेभिर्जातवेदो हुवानः ।

यज्ञं गिरौ जरितुः सुष्टुतिं च विश्वै गन्त मरुतो विश्व ऊती १०

आ नो दिवो बृहतः पर्वतादा सरस्वती यजता गन्तु यज्ञम् ।

हव देवी जुजुषाणा घृताचीं शग्मां नो वाचमुशती शृणोतु ११

आ वेधसं नीलपृष्ठं बृहन्तं बृहस्पतिं सद्ने सादयध्वम् ।
 सादद्यौनिं दम् आ दिदिवांसं हिरण्यवर्णमरुषं सपेम १२
 आ धर्णसिर्बृहद्विवो रराणो विश्वेभिर्गन्त्वोर्मभिर्हुवानः ।
 ग्रा वसान् ओषधीरमृध्रस्त्रिधातुशृङ्गो वृषभो वयोधाः १३
 मातुष्पदे परमे शुक्र आयो विपन्यवो रास्पिरासो अगमन् ।
 सुशेव्यं नमसा रातहव्याः शिशुं मृजन्त्यायवो न वासे १४
 बृहद् वयो बृहते तुभ्यमग्ने धियाजुरौ मिथुनासः सचन्त ।
 देवोदैवः सुहवो भूतु मह्यं मा नो माता पृथिवी दुर्मतौ धात् १५
 उरौ देवा अनिबाधे स्यामि १६
 समश्चिनोरवसा नूतनेन मयोभुवा सुप्रणीती गमेम ।
 आ नो रयिं वहतमोत वीराना विश्वान्यमृता सौभंगानि १७

(४४) चतुश्चत्वारिंशं सूक्तम्

(१-१५) पञ्चदशर्चस्यास्य सूक्तस्य काश्यपोऽवत्सारो लिङ्गोक्ताश्च ऋषयः । विश्वे
 देवा देवताः । (१-१३) प्रथमादित्रयोदशर्चा जगती, (१४-१५)

चतुर्दशीपञ्चदशयोश्च त्रिष्टुप् छन्दसी

तं प्रत्नथां पूर्वथां विश्वथेमथा ज्येष्ठतातिं बर्हिषदं स्वर्विदम् ।
 प्रतीचीनं वृजनं दोहसे गिरा ऽऽशं जयन्तमनु यासु वर्धसे १
 श्रिये सुदृशीरुपरस्य याः स्वर्विरोचमानः ककुभामचोदते ।
 सुगोपा असि न दभाय सुक्रतो परो मायाभिर्ऋत आस नाम ते २
 अत्यं हविः सचते सच्च धातु चाऽरिष्टगातुः स होता सहोभरिः ।
 प्रसस्त्राणो अनु बर्हिर्वृषा शिशुर्मध्ये युवाजुरौ विस्नुहा हितः ३
 प्र व एते सुयुजो यामन्निष्टये नीचीरमुष्मै युम्यं ऋतावृधः ।
 सुयन्तुभिः सर्वशासैरभीशभिः क्रिविर्नामानि प्रवृणे मुषायति ४
 संजर्भुराणस्तरुभिः सुतेगृभं वयाकिनं चित्तगर्भासु सुस्वरुः ।
 धारवाकेष्वृजुगाथ शोभसे वर्धस्व पत्नीरभि जीवो अर्ध्वरे ५
 यादृगेव ददृशे तादृगुच्यते सं छायायां दधिरे सिध्याप्स्वा ।
 महीमस्मभ्यंमुरुषामुरु ज्यो बृहत् सुवीरमनपच्युतं सहः ६
 वेत्यग्रुर्जनिवान् वा अति स्पृधः समर्यता मनसा सूर्यः कविः ।
 घंसं रक्षन्तं परि विश्वतो गयं मस्माकं शर्म वनवत् स्वावसुः ७

ज्यायांसमस्य यतुनस्य केतुन ऋषिस्वरं चरति यासु नाम ते ।
 यादृश्मिन् धायि तमपस्यया विद्द् य उं स्वयं वहते सो अरं करत् ८
 समुद्रमासामव तस्थे अग्निमा न रिष्यति सर्वनं यस्मिन्नायता ।
 अत्रा न हार्दि क्रवणस्य रेजते यत्रा मतिर्विद्यते पूतबन्धनी ९
 स हि क्षत्रस्य मनसस्य चित्तिभि रेवावदस्य यजतस्य सधैः ।
 अवत्सारस्य स्पृणवाम् रणवभिः शविष्ठं वाजं विदुषा चिदध्वम् १०
 श्येन आसामदितिः कद्योर्इ मदौ विश्ववारस्य यजतस्य मायिनः ।
 समन्यमन्यमर्थयन्त्येतवे विदुर्विषाणं परिपानमन्ति ते ११
 सदापृणो यजतो वि द्विषौ वधीद् बाहुवृक्तः श्रुतवित् तयो वः सचा ।
 उभा स वरा प्रत्येति भाति च यदीं गणं भजते सुप्रयावभिः १२
 सुतंभरो यजमानस्य सत्पति विश्वासामूधः स धियामुदञ्चनः ।
 भरद् धेनू रसवच्छिश्रिये पयोऽनुब्रुवाणो अध्येति न स्वपन् १३
 यो जागार तमृचः कामयन्ते यो जागार तमु सामानि यन्ति ।
 यो जागार तमयं सोमं आह तवाहमस्मि सख्ये न्योकाः १४
 अग्निर्जागार तमृचः कामयन्ते ऽग्निर्जागार तमु सामानि यन्ति ।
 अग्निर्जागार तमयं सोमं आह तवाहमस्मि सख्ये न्योकाः १५
 चतुर्थोऽनुवाकः

४५ । ५६

(४५) पञ्चचत्वारिंशं सूक्तम्

(१-११) एकादशर्चस्यास्य सूक्तस्यात्रेयः सदापृण ऋषिः । विश्वे देवा देवताः ।

त्रिष्टुप् छन्दः

विदा दिवो विष्यन्नद्रिमुक्थै रायत्या उषसौ अर्चिनो गुः ।
 अपावृत वृजिनीरुत् स्वर्गाद् वि दुरो मानुषीर्देव आवः १
 वि सूर्यो अमतिं न श्रियं सादो वाद् गवां माता जानती गात् ।
 धन्वर्णसो नद्यश् ४७-: खादोअर्णाः स्थूणैव सुमिता दृहत द्यौः २
 अस्मा उक्थाय पर्वतस्य गर्भो महीनां जनुषे पूर्व्याय ।
 वि पर्वतो जिहीत साधत द्यौ राविवासन्तो दसयन्त भूम ३
 सूक्तेभिर्वो वचोभिर्देवजुष्टै रिन्द्रा न्वश्री अवसे हुवध्यै ।
 उक्थेभिर्हि ष्मा कवयः सुयज्ञा आविवासन्तो मरुतो यजन्ति ४

एतो न्वश्द्य सुध्योऽ भवाम् प्र दुच्छुनां मिनवामा वरीयः ।
 आरे द्वेषोसि सनुतर्दधामा ऽर्याम् प्राञ्चो यजमानमच्छ ५
 एता धिर्यं कृण्वामा सखायो ऽप या मातां ऋणुत वृजं गोः ।
 यया मनुर्विशिशिप्रं जिगाय यया वृणिग्वङ्कुरापा पुरीषम् ६
 अनूनोदत्र हस्तयतो अद्रि रार्चन् येन दश मासो नवग्वाः ।
 ऋतं यती सरमा गा अविन्दद् विश्वानि सत्याङ्गिराश्चकार ७
 विश्वे अस्या व्युषि माहिनायाः सं यद् गोभिरङ्गिरसो नवन्त ।
 उत्सं आसां परमे सधस्थं ऋतस्यं पथा सरमा विद्द् गाः ८
 आ सूर्यो यातु सप्ताश्वः क्षेत्रं यदस्योर्विया दीर्घयाथे ।
 रघुः श्येनः पतयदन्धो अच्छा युवा कविर्दीदयद् गोषु गच्छन् ९
 आ सूर्यो अरुहच्छुक्रमणो ऽयुक्त यद्धरितौ वीतपृष्ठाः ।
 उदना न नावमनयन्त धीरां आश्रुणवतीरापो अर्वागतिष्ठन् १०
 धिर्यं वो अप्सु दधिषे स्वर्षा ययातरन् दश मासो नवग्वाः ।
 अया धिया स्याम देवगौपा अया धिया तुतुर्यामात्यंहः ११

(४६) षट्चत्वारिंशं सूक्तम्

(१-८) अष्टर्चस्यास्य सूक्तस्यात्रेयः प्रतिक्षत्र ऋषिः । (१-६) प्रथमादिषडृचां विश्वे
 देवाः, (७-८) सम्यष्टम्योश्च देवपत्न्यो देवताः । (१, ३-७)

प्रथमर्चस्तृतीयादिपञ्चानाञ्च जगती, (२, ८) द्वितीयाष्टम्योश्च त्रिष्टुप् छन्दसी
 हयो न विद्वाँ अयुजि स्वयं धुरि तां वहामि प्रतरणीमवस्युर्वम् ।
 नास्यां वश्मि विमुचं नावृतं पुनर्विद्वान् पथः पुरएत ऋजु नैषति १
 अग्र इन्द्र वरुण मित्र देवाः शर्धः प्र यन्त मारुतोत विष्णो ।
 उभा नासत्या रुद्रो अध ग्राः पूषा भगः सरस्वती जुषन्त २
 इन्द्राग्नी मित्रावरुणादितिं स्वः पृथिवीं द्यां मरुतः पर्वताँ अपः ।
 हुवे विष्णुं पूषणं ब्रह्मणस्पतिं भगं नु शंसं सवितारमूतये ३
 उत नो विष्णुरुत वातो अस्त्रिधौ द्रविणोदा उत सोमो मयस्करत् ।
 उत ऋभवं उत राये नो अश्विनोत त्वष्टोत विभ्वानु मंसते ४
 उत त्यन्नो मारुतं शर्ध आ गमद् दिविक्ष्यं यजतं बर्हिरासदे ।
 बृहस्पतिः शर्म पूषोत नो यमद् वरुथ्यं वरुणो मित्रो अर्यमा ५
 उत त्ये नः पर्वतासः सुशस्तयः सुदीतयो नद्यश्स्त्रामणे भुवन् ।

भगौ विभक्ता शवसावसा गम दुरुव्यचा अदितिः श्रोतु मे हवम् ६
 देवानां पत्नीरुशतीरवन्तु नः प्रावन्तु नस्तुजये वाजसातये ।
 याः पार्थिवासो या अपामपि वृते ता नो देवीः सुहवाः शर्म यच्छत ७
 उत ग्रा व्यन्तु देवपत्नी रिन्द्राणयश्ग्राय्यश्विनी राट् ।
 आ रोदसी वरुणानी शृणोतु व्यन्तु देवीर्य ऋतुर्जनीनाम् ८

तृतीयोऽध्यायः

व० १ ।३१

(४७) सप्तचत्वारिंशं सूक्तम्

(१-७) सप्तर्चस्यास्य सूक्तस्यात्रेयः प्रतिरथ ऋषिः । विश्वे देवा देवताः ।

त्रिष्टुप् छन्दः

प्रयुञ्जती दिव एति ब्रुवाणा मही माता दुहितुर्बोधयन्ती ।
 आविवांसन्ती युवतिर्मनीषा पितृभ्य आ सदर्ने जोहुवाना १
 अजिरासस्तदप ईयमाना आतस्थिवांसौ अमृतस्य नाभिम् ।
 अनन्तास उरवौ विश्वतः सीं परि द्यावापृथिवी यन्ति पन्थाः २
 उक्षा समुद्रो अरुषः सुपर्णः पूर्वस्य योनिं इंपतुरा विवेश ।
 मध्ये दिवो निहितः पृश्निरश्मा वि चक्रमे रजसस्पात्यन्तौ ३
 चत्वार ईं बिभ्रति क्षेमयन्तो दश गर्भं चरसे धापयन्ते ।
 त्रिधातवः परमा अस्य गावो दिवश्चरन्ति परि सद्यो अन्तान् ४
 इदं वपुर्निवचनं जनासु श्वरन्ति यन्नद्यस्तस्थुरापः ।
 द्वे यदीं बिभृतो मातुरन्ये इहेह जाते यम्याइं सबन्धू ५
 वि तन्वते धियो अस्मा अपांसि वस्त्रा पुत्राय मातरौ वयन्ति ।
 उपप्रक्षे वृषणो मोदमाना दिवस्पथा वध्वौ यन्त्यच्छ ६
 तदस्तु मित्रावरुणा तदग्ने शं योरस्मभ्यमिदमस्तु शस्तम् ।
 अशीमहिं गाधमुत प्रतिष्ठां नमो दिवे बृहते सार्दनाय ७

(४८) अष्टचत्वारिंशं सूक्तम्

(१-५) पञ्चर्चस्यास्य सूक्तस्यात्रेयः प्रतिभानुर्ऋषिः । विश्वे देवा देवताः ।

जगती छन्दः

कटुं प्रियाय धाम्ने मनामहे स्वक्षत्राय स्वयशसे महे वयम् ।

आमेन्यस्य रजसो यदभ्र आँ अपो वृणाना वितनोति मायिनी १
 ता अत्रत वयुन वीरवक्ष्णं समान्या वृतया विश्वमा रजः ।
 अपो अपाचीरपरा अपैजते प्र पूर्वाभिस्तिरते देवयुर्जनः २
 आ ग्रावभिरहन्यैभिरक्तुभिर्वरिष्ठं वज्रमा जिघर्ति मायिनि ।
 शतं वा यस्य प्रचरन् त्वे दमे संवर्तयन्तो वि च वर्तयन्नहा ३
 तामस्य रीतिं परशोरिव प्रत्य नीकमख्यं भुजे अस्य वर्षसः ।
 सचा यदि पितुमन्तमिव क्षयं रत्नं दधाति भरहूतये विशे ४
 स जिहया चतुरनीक ऋञ्जते चारु वसानो वरुणो यतन्नरिम् ।
 न तस्य विद्य पुरुषत्वता वयं यतो भगः सविता दाति वार्यम् ५

(४६) एकोनपञ्चाशं सूक्तम्

(१-५) पञ्चर्चस्यास्य सूक्तस्यात्रेयः प्रतिप्रभ ऋषिः । विश्वे देवा देवताः ।

त्रिष्टुप् छन्दः

देवं वौ अद्य सवितारमेषे भगं च रत्नं विभर्जन्तमायोः ।
 आ वा नरा पुरुभुजा ववृत्यां दिवेदिवे चिदश्विना सखीयन् १
 प्रति प्रयाणमसुरस्य विद्वान् त्सूक्तैर्देवं सवितारं दुवस्य ।
 उपं ब्रुवीत नमसा विजान ज्ञयेष्टं च रत्नं विभर्जन्तमायोः २
 अदत्रया दयते वार्याणि पूषा भगो अदितिर्वस्त उस्त्रः ।
 इन्द्रो विष्णुर्वरुणो मित्रो अग्नि रहानि भद्रा जनयन्त दुस्माः ३
 तन्नो अनर्वा सविता वरुथं तत् सिन्धव इषयन्तो अनु ग्मन् ।
 उप यद् वोचै अध्वरस्य होता रायः स्याम पतयो वाजरत्नाः ४
 प्र ये वसुभ्य ईवदा नमो दुर्ये मित्रे वरुणे सूक्तवाचः ।
 अवैत्वर्ध्वं कृणुता वरीयो दिवस्पृथिव्योरवसा मदेम ५

(५०) पञ्चाशं सूक्तम्

(१-५) पञ्चर्चस्यास्य सूक्तस्यात्रेयः स्वस्त्यात्रेय ऋषिः । विश्वे देवा
 देवताः । (१-४) प्रथमादिचतुर्त्रचामनुष्टुप् , (५) पञ्चम्याश्च

पङ्क्तिश्छन्दसी

विश्वो देवस्य नेतु मर्तो वुरीत सख्यम् ।
 विश्वो राय इषुध्यति द्युम्नं वृणीत पुष्यसै १

ते तै देव नेत॒र्ये चे॒माँ अ॒नुश॑से ।
 ते रा॒या ते ह्या॒ऽपृ॒चे स॒चेम॑हि स॒च॒थ्यैः २
 अ॒तौ न॒ आ नृ॑न॒तिथी॑ न॒तः प॒त्नीर्द॑शस्यत ।
 आ॒रे वि॒श्वं प॒थेष्ठां॑ द्वि॒षो यु॑योतु यू॒युविः ३
 यत्र॑ व॒ह्नि॒रभि॑र्हितो दु॒द्रव॑द् द्रो॒णयः॑ प॒शुः ।
 नृ॒मणां॑ वी॒रप॑स्त्यो ऽर्णा॒ धीरे॑व॒ स॒र्निता ४
 एष॑ तै देव ने॒ता र॒थस्प॑तिः शं॒ रयिः॑ ।
 शं॒ रा॒ये शं॒ स्व॒स्तय॑ इ॒षः स्तु॑तो॒ मना॑महे दे॒वस्तु॑तो॒ मना॑महे ५

(५१) एकपञ्चाशं सूक्तम्

(१-१५) पञ्चदशर्चस्यास्य सूक्तस्यात्रेयः स्वस्त्यात्रेय ऋषिः । (१-३, ८-१५)
 प्रथमादितृचस्याष्टम्याद्यष्टर्चाञ्च विश्वे देवाः, (४, ६-७) चतुर्थ्याः
 षष्ठीसप्तम्योश्चेन्द्रवायु, (५) पञ्चम्याश्च वायुर्देवताः । (१-४) प्रथमादिचतुर्भृचां
 गायत्री, (५-१०) पञ्चम्यादिषण्णामुष्णिक, (११-१३) एकादश्यादितृचस्य जगती
 त्रिष्टुब् वा, (१४-१५) चतुर्दशीपञ्चदशयोश्चानुष्टुप् छन्दांसि
 अ॒ग्ने॑ सु॒तस्य॑ पी॒तये॑ वि॒श्वैरू॑मे॒भिरा॑ ग॒हि । दे॒वेभि॑र्ह॒व्यदा॑तये १
 ऋ॒त॒धी॒तय॑ आ ग॒त॒ स॒त्य॒धर्मा॑णो अ॒ध्व॒रम् । अ॒ग्नेः पि॑बत जि॒ह्वया॑ २
 वि॒प्रेभि॑र्विप्र स॒न्त्य प्रा॑त॒र्याव॑भिरा ग॒हि । दे॒वेभिः॑ सोम॒पीत॑ये ३
 अ॒यं सोम॑श्च॒मू सु॒तो ऽम॑त्रे॒ परि॑ षिच्यते । प्रि॒य इन्द्रा॑य वा॒यवे॑ ४
 वा॒य॒वा या॑हि वी॒तये॑ जुषा॒णो ह॒व्यदा॑तये ।
 पि॒बा सु॒तस्या॑न्ध॒सो अ॒भि प्र॑यः ५
 इन्द्र॑श्च वा॒यवेषां॑ सु॒तानां॑ पी॒तिर्म॑र्हथः । ताञ्जु॑षेथाम॒रेप॑सा॒व॒भि प्र॑यः ६
 सु॒ता इन्द्रा॑य वा॒यवे॑ सोमा॒सो द॒ध्या॑शिरः ।
 नि॒म्रं न॑ य॒न्ति सि॑न्ध॒वोऽभि॑ प्रयः ७
 स॒जूर्वि॑श्वे॒भिर्दे॒वेभि॑र॒श्विभ्या॑मु॒षसा॑ स॒जूः । आ या॑ह्यग्ने अ॒त्रिव॑त् सु॒ते र॑ण ८
 स॒जूर्मि॑त्रावरु॒णाभ्यां॑ स॒जूः सोमै॑न॒ विष्णु॑ना । आ या॑ह्यग्ने अ॒त्रिव॑त् सु॒ते र॑ण ९
 स॒जूरा॑दि॒त्यैर्व॑सु॒भिः स॒जूरि॑न्द्रै॒ण वा॒युना॑ । आ या॑ह्यग्ने अ॒त्रिव॑त् सु॒ते र॑ण १०
 स्व॒स्ति नो॑ मिमी॒ताम॑श्वि॒ना भ॑गः स्व॒स्ति दे॒व्यदि॑तिर॒नुर्व॑णः ।
 स्व॒स्ति पू॒षा अ॑सुरो दधातु नः स्व॒स्ति द्या॒वापृ॑थि॒वी सु॑चेतुना ११
 स्व॒स्तये॑ वा॒युमु॑प॒ ब्रवा॑महै सोमं स्व॒स्ति भु॑र्व॒नस्य॑ यस्पतिः ।

बृहस्पतिं सर्वगणं स्वस्तये स्वस्तये आदित्यासौ भवन्तु नः १२
 विश्वे देवा नो अद्या स्वस्तये वैश्वानरो वसुरग्निः स्वस्तये ।
 देवा अवन्त्वृभवः स्वस्तये स्वस्ति नो रुद्रः पात्वंहसः १३
 स्वस्ति मित्रावरुणा स्वस्ति पथ्ये रेवति ।
 स्वस्ति न इन्द्रश्चाग्निश्च स्वस्ति नो अदिते कृधि १४
 स्वस्ति पन्थामनु चरेम सूर्याचन्द्रमसाविव ।
 पुनर्ददताघ्नता जानता सं गमेमहि १५

(५२) द्विपञ्चाशं सूक्तम्

(१-१७) सप्तदशर्चस्यास्य सूक्तस्यात्रेयः श्यावाश्व ऋषिः । मरुतो देवताः । (१-
 ५, ७-१५) प्रथमादिपञ्चर्चा सप्तम्यादिनवानान्चानुष्टुप् , (६, १६-१७) षष्ठ्याः
 षोडशीसप्तदशयोश्च पङ्क्तिश्छन्दसी

प्र श्यावाश्व धृष्णुया ऽर्चा मरुद्भिर्ऋक्वृभिः ।
 ये अद्रोघमनुष्वधं श्रवो मदन्ति यज्ञियाः १
 ते हि स्थिरस्य शर्वसः सर्वायुः सन्ति धृष्णुया ।
 ते यामन्ना धृषद्विनस्तमना पान्ति शश्वतः २
 ते स्पन्द्रासो नोक्षणो ऽति ष्कन्दन्ति शर्वरीः ।
 मरुतामधा महो दिवि क्षमा च मन्महे ३
 मरुत्सु वो दधीमहि स्तोमं यज्ञं च धृष्णुया ।
 विश्वे ये मानुषा युगा पान्ति मर्त्यं रिषः ४
 अहन्तो ये सुदानवो नरो असांमिशवसः ।
 प्र यज्ञं यज्ञियैभ्यो दिवो अर्चा मरुद्भ्यः ५
 आ रुक्मैरा युधा नरं ऋष्वा ऋष्टीरंसृक्षत ।
 अन्वेनाँ अहं विद्युतो मरुतो जज्जतीरिव भानुरर्तु त्मना दिवः ६
 ये वावृधन्त पार्थिवा य उरावन्तरिक्ष आ ।
 वृजनै वा नदीनां सधस्थै वा महो दिवः ७
 शर्धो मारुतमुच्छस सत्यशवसमृभ्वसम् ।
 उत स्म ते शभे नरः प्र स्पन्द्रा युजत त्मना ८
 उत स्म ते परुष्या मूर्णा वसत शन्ध्यवः ।
 उत पुव्या रथाना मद्रिं इभन्दन्त्योजसा ९

आपथयो विपथयो ऽन्तस्पथा अनुपथाः ।
 एतेभिर्मह्यं नामभि र्यज्ञं विष्टार औहते १०
 अधा नरो न्यौहते ऽधा नियुत ओहते ।
 अधा पारावता इति चित्रा रूपाणि दर्श्या ११
 छन्दःस्तुभः कुभन्यव उत्समा कीरिणौ नृतुः ।
 ते मे के चित्र तायव ऊमा आसन् दृशि त्विषे १२
 य ऋष्वा ऋष्टिविद्युतः कवयः सन्ति वेधसः ।
 तमृषे मारुतं गणं नमस्या रमया गिरा १३
 अच्छ ऋषे मारुतं गणं दाना मित्रं न योषणा ।
 दिवो वा धृष्णव ओजसा स्तुता धीभिरिषणयत १४
 नू मन्वान एषां देवाँ अच्छा न वक्षणा ।
 दाना संचेत सूरिभि र्यामश्रुतेभिरञ्जिभिः १५
 प्र ये मै बन्ध्वेषे गां वोचन्त सूरयः पृशिनं वोचन्त मातरम् ।
 अधा पितरमिष्मिणं रुद्रं वोचन्त शिक्वसः १६
 सप्त मै सप्त शाकिन एकमेका शता ददुः ।
 यमुनायामधि श्रुत मुद् राधो गव्यं मृजे नि राधो अश्वयं मृजे १७

(५३) त्रिपञ्चाशं सूक्तम्

(१-१६) षोडशर्चस्यास्य सूक्तस्यात्रेयः श्यावाश्व ऋषिः । मरुतो देवताः । (१,
 ५, १०-११, १५) प्रथमापञ्चमीदशम्येकादशीपञ्चदशीनामृचां ककुभ् , (२)
 द्वितीयाया बृहती, (३) तृतीयाया अनुष्टुप् , (४) चतुर्थ्याः पुर उष्णिक्, (६-७,
 ९, १३-१४, १६) षष्ठीसप्तमीनवमीत्रयोदशीचतुर्दशीषोडशीनां सतोबृहति, (८,
 १२) अष्टमीद्वादशयोश्च गायत्री छन्दांसि

को वैद जानमेषां को वा पुरा सुम्रेष्वास मरुताम् ।

यद् युयुजे किलास्यः १

ऐतान् रथेषु तस्थुषः कः शुश्राव कथा ययुः ।

कस्मै सस्रुः सुदासे अन्वापय इळाभिवृष्टयः सह २

ते म आहुर्य आययु रुप द्युभिर्विभिर्मदे ।

नरो मर्या अरेपस इमान् पश्यन्निति ष्टहि ३

ये अञ्जिषु ये वाशीषु स्वभानवः स्रक्षु रुक्मेषु खादिषु ।
 श्राया रथेषु धन्वसु ४
 युष्माकं स्मा रथां अनु मुदे दधे मरुतो जीरदानवः ।
 वृष्टी द्यावो यतीरिव ५
 आ यं नरः सुदानवो ददाशुषे दिवः कोशमचुच्यवुः ।
 वि पर्जन्यं सृजन्ति रोदसी अनु धन्वना यन्ति वृष्टयः ६
 ततृदानाः सिन्धवः क्षोदसा रजः प्र संस्रुर्धेनवो यथा ।
 स्यन्ना अश्वा इवा ध्वनो विमोचने वि यद् वर्तन्त एन्यः ७
 आ यात मरुतो दिव आन्तरिक्षाद्मादुत ।
 माव स्थात परावतः ८
 मा वो रसानितभा कुभा कुमुर्मा वः सिन्धुर्नि रीरमत् ।
 मा वः परिष्ठात् सरयुः पुरीषिण्य स्मे इत् सुम्रमस्तु वः ९
 तं वः शर्धं रथानां त्वेषं गृणं मारुतं नव्यसीनाम् ।
 अनु प्र यन्ति वृष्टयः १०
 शर्धंशर्धं व एषां व्रातव्रातं गृणंगृणं सुशस्तिभिः ।
 अनु क्रामेम धीतिभिः ११
 कस्मा अद्य सुजाताय रातहव्यायु प्र ययुः ।
 एना यामैन मरुतः १२
 येन तोकाय तनयाय धान्यं बीजं वहध्वे अक्षितम् ।
 अस्मभ्यं तद् धत्तनु यद् व ईमहे राधौ विश्वायु सौभगम् १३
 अतीयाम निदस्तिरः स्वस्तिभिर्हित्वावद्यमरातीः ।
 वृष्टी शं योराप उस्त्रि भैषजं स्याम मरुतः सह १४
 सुदेवः समहासति सुवीरो नरो मरुतः स मर्त्यः ।
 यं त्रायध्वे स्याम ते १५
 स्तुहि भोजान् त्स्तुवतो अस्य यामनि रणन् गावो न यवसे ।
 यतः पूर्वा इव सखीरनु ह्वय गिरा गृणीहि कामिनः १६

(५४) चतुष्पञ्चाशं सूक्तम्

(१-१५) पञ्चदशर्चस्यास्य सूक्तस्यात्रेयः श्यावाश्च ऋषिः । मरुतो देवताः । (१-
 १३, १५) प्रथमादित्रयोदशर्चा पञ्चदश्याश्च जगती,

(१४) चतुर्दश्याश्च त्रिष्टुप् छन्दसी

प्र शर्धायु मारुतायु स्वभानव इमां वाचमनजा पर्वतच्युते ।
घर्मस्तुभे दिव आ पृष्ठयज्वने द्युम्रश्रवसे महि नृष्णमर्चत १
प्र वो मरुतस्तविषा उदन्यवो वयोवृधो अश्वयुजः परिज्रयः ।
सं विद्युता दधति वाशति त्रितः स्वरन्त्यापोऽवना परिज्रयः २
विद्युन्महसो नरो अश्मदिद्यवो वार्तत्विषो मरुतः पर्वतच्युतः ।
अब्दया चिन्मुहुरा हादुनीवृतः स्तनयदमा रभसा उदौजसः ३
व्यश्क्तून् रुद्रा व्यहानि शिक्वसो व्यश्न्तरिज्ञं वि रजांसि धूतयः ।
वि यदज्राँ अजथ नाव ई यथा वि दुर्गाणि मरुतो नाह रिष्यथ ४
तद् वीर्यं वो मरुतो महित्वनं दीर्घं तैतान् सूर्यो न योजनम् ।
एता न यामे अगृभीतशोचिषो ऽनश्चदां यन्नचयातना गिरिम् ५
अभ्राजि शर्धो मरुतो यदर्णसं मोषथा वृक्षं कपनेव वेधसः ।
अर्धं स्मा नो अरमतिं सजोषसश्चक्षुरिव यन्तमनु नेषथा सुगम् ६
न स जीयते मरुतो न हन्यते न स्रैधति न व्यथते न रिष्यति । नास्य राय
उप दस्यन्ति नोतय ऋषिं वा यं राजानं वा सुषूदथ ७
नियुत्वन्तो ग्रामजितो यथा नरो ऽर्यमणो न मरुतः कबन्धिनः ।
पिन्वन्त्युत्सं यदिनासो अस्वरन् व्युन्दन्ति पृथिवीं मध्वो अन्धसा ८
प्रवत्वतीयं पृथिवी मरुद्भ्यः प्रवत्वती द्यौर्भवति प्रयद्भ्यः ।
प्रवत्वतीः पृथ्या अन्तरिक्ष्याः प्रवत्वन्तः पर्वता जीरदानवः ९
यन्मरुतः सभरसः स्वर्णरः सूर्य उदिते मदथा दिवो नरः ।
न वोऽश्वाः श्रथयन्ताह सिस्रतः सद्यो अस्याध्वनः पारमश्नुथ १०
अंसैषु व ऋष्टयः पत्सु खादयो वक्षःसु रुक्मा मरुतो रथे शुभः ।
अग्निभ्राजसो विद्युतो गर्भस्त्योः शिप्राः शीर्षसु वितता हिरण्ययीः ११
तं नाकमर्यो अगृभीतशोचिषं रुशत् पिप्पलं मरुतो वि धूनुथ ।
समच्यन्त वृजनातिं त्विषन्त यत् स्वरन्ति घोषं विततमृतायवः १२
युष्मादत्तस्य मरुतो विचेतसो रायः स्याम रथ्योऽ वयस्वतः ।
न यो युच्छति तिष्योऽ यथा दिवोऽ ऽस्मे रोरन्त मरुतः सहस्त्रिणम् १३
यूयं रयिं मरुतः स्पार्हवीरं यूयमृषिमवथ सामविप्रम् ।
यूयमर्वन्तं भरताय वाजं यूयं धत्थ राजानं श्रुष्टिमन्तम् १४
तद् वो यामि द्रविणं सद्यऊतयो येना स्वर्णं ततनाम् नूरभि ।

इदं सु मे मरुतो हर्यता वचो यस्य तरैम तरसा शतं हिमाः १५

(५५) पञ्चपञ्चाशं सूक्तम्

(१-१०) दशर्चस्यास्य सूक्तस्यात्रेयः श्यावाश्च ऋषिः । मरुतो देवताः । (१-६)

प्रथमादिनवर्चा जगती, (१०) दशम्याश्च त्रिष्टुप् छन्दसी
 प्रयज्यवो मरुतो भ्राजदृष्टयो बृहद् वयो दधिरे रुक्मवक्षसः ।
 ईयन्ते अश्वैः सुयमैभिराशुभिः शुभं यातामनु रथा अवृत्सत १
 स्वयं दधिध्वे तविषीं यथा विद बृहन्महान्त उर्विया वि राजथ ।
 उतान्तरिक्षं ममिरे व्योजसा शुभं यातामनु रथा अवृत्सत २
 साकं जाताः सुभ्वः साकमुद्धिताः श्रिये चिदा प्रतरं वावृधुर्नरः ।
 विरोकिणः सूर्यस्येव रश्मयः शुभं यातामनु रथा अवृत्सत ३
 आभूषेण्य वो मरुतो महित्वनं दिदृक्षेण्यं सूर्यस्येव चक्षणम् ।
 उतो अस्माँ अमृतत्वे दधातन शुभं यातामनु रथा अवृत्सत ४
 उदीरयथा मरुतः समुद्रतो यूयं वृष्टिं वर्षयथा पुरीषिणः ।
 न वो दस्त्रा उप दस्यन्ति धेनवः शुभं यातामनु रथा अवृत्सत ५
 यदश्वान् धूर्षु पृषतीरयुग्ध्वं हिरण्ययान् प्रत्यत्काँ अमुग्ध्वम् ।
 विश्वा इत् स्पृधौ मरुतो व्यस्यथ शुभं यातामनु रथा अवृत्सत ६
 न पर्वता न नद्यो वरन्त वो यत्राचिध्वं मरुतो गच्छथेदु तत् ।
 उत द्यावापृथिवी याथना परि शुभं यातामनु रथा अवृत्सत ७
 यत् पूर्यं मरुतो यच्च नूतनं यदुद्यते वसवो यच्च शस्यते ।
 विश्वस्य तस्य भवथा नवेदसः शुभं यातामनु रथा अवृत्सत ८
 मृळत नो मरुतो मा वधिष्टनाऽस्मभ्यं शर्म बहुलं वि यन्तन ।
 अधि स्तोत्रस्य सख्यस्य गातन शुभं यातामनु रथा अवृत्सत ९
 यूयमस्मान् नयत वस्यो अच्छा निरहृतिभ्यो मरुतो गृणानाः ।
 जुषध्वं नो हव्यदातिं यजत्रा वयं स्याम पतयो रयीणाम् १०

(५६) षट्पञ्चाशं सूक्तम्

(१-६) नवर्चस्यास्य सूक्तस्यात्रेयः श्यावाश्च ऋषिः । मरुतो देवताः । (१-२,
 ४-६, ८-९) प्रथमाद्वितीययोर्ऋचोश्चतुर्थ्यादितृचस्याष्टमीनवम्योश्च बृहती, (३, ७)

तृतीयासप्तम्योश्च सतोबृहती छन्दसी

अग्ने शर्धन्तमा गुणं इंपृष्टं रुक्मेभिरञ्जिभिः ।
विशो अद्य मरुतामव ह्वये दिवश्चिद् रोचनादधि १
यथा चिन्मन्यसे हृदा तदिन्मै जग्मुराशसः ।
ये ते नेदिष्ठं हर्वनान्यागमन् तान् वर्ध भीमसदृशः २
मीळहुष्मतीव पृथिवी पराहता मदन्त्येत्यस्मदा ।
ऋक्षो न वो मरुतः शिमीवाँ अमो दुधो गौरिव भीमयुः ३
नि ये रिणन्त्योर्जसा वृथा गावो न दुर्धुरः ।
अश्मान चित् स्वर्यं पर्वतं गिरिं प्र च्यावयन्ति यामभिः ४
उत् तिष्ठ नूनमैषां स्तोमैः समुक्षितानाम् ।
मरुतां पुरतमपूर्व्यं गवां सर्गमिव ह्वये ५
युङ्गध्वं ह्यरुषी रथे युङ्गध्वं रथेषु रोहितः ।
युङ्गध्वं हरी अजिरा धुरि वोळहवे वहिष्ठा धुरि वोळहवे ६
उत स्य वाज्यरुषस्तुविष्वणिं रिह स्म धायि दर्शतः ।
मा वो यामेषु मरुतश्चिरं करत् प्र तं रथेषु चोदत ७
रथं नु मारुतं वयं श्रवस्युमा हवामहे ।
आ यस्मिन् तस्थौ सुरणानि बिभ्रती सचा मरुत्सु रोदसी ८
तं वः शर्धं रथेशुर्भ त्वेषं पनस्युमा हवे ।
यस्मिन् त्सुजाता सुभगा महीयते सचा मरुत्सु मीळहुषी ९

पञ्चमोऽनुवाकः

व० ५७ ।७२

(५७) सप्तपञ्चाशं सूक्तम्

(१-८) अष्टर्चस्यास्य सूक्तस्यात्रेयः श्यावाश्च ऋषिः । मरुतो देवताः । (१-९)

प्रथमादिषडृचां जगती, (७-८) सप्तम्यष्टम्योश्च त्रिष्टुप् छन्दसी

आ रुद्रासु इन्द्रवन्तः सजोषसो हिरण्यरथाः सुविताय गन्तन ।
इयं वो अस्मत् प्रति हर्यते मति स्तृष्णाजे न दिव उत्सा उदन्यवे १
वाशीमन्त ऋष्टिमन्तो मनीषिणः सुधन्वान् इषुमन्तो निषङ्गिणः ।
स्वश्वाः स्थ सुरथाः पृश्निमातरः स्वायुधा मरुतो याथना शुभम् २
धूनुथ द्यां पर्वतान् दाशुषे वसु नि वो वना जिहते यामनो भिया ।

कोपयथ पृथिवीं पृथिनमातरः शभे यदुग्राः पृषतीरयुग्ध्वम् ३
 वातत्वेषो मरुतो वर्षनिर्णिजो यमा इव सुसदृशः सुपेशसः ।
 पिशङ्गाश्वा अरुणाश्वा अरेपसः प्रत्वक्षसो महिना द्यौरिवोरवः ४
 पुरुद्रप्सा अञ्जिमन्तः सुदानव स्त्वेषसदृशो अनवभ्रराधसः ।
 सुजातासौ जनुषा रुक्मवक्षसो दिवो अर्का अमृतं नाम भेजिरे ५
 ऋष्टयो वो मरुतो असयोरधि सह ओजो बाहोर्वो बलं हितम् ।
 नृणा शीर्षस्वायुधा रथेषु वो विश्वा वः श्रीरधि तनूषु पिपिशे ६
 गोमदश्वावद् रथवत् सुवीरं चन्द्रवद् राधौ मरुतो ददा नः ।
 प्रशस्तिं नः कृणुत रुद्रियासो भक्षीय वोऽवसो दैव्यस्य ७
 ह्ये नरो मरुतो मृळता न स्तुवीमघासो अमृता ऋतज्ञाः ।
 सत्यश्रुतः कवयो युवानो बृहद्विरयो बृहदुक्षमाणाः ८

(५८) अष्टपञ्चाशं सूक्तम्

(१-८) अष्टर्चस्यास्य सूक्तस्यात्रेयः श्यावाश्व ऋषिः । मरुतो देवताः ।

त्रिष्टुप् छन्दः

तमुं नूनं तविषीमन्तमेषां स्तुषे गृणं मारुतं नव्यसीनाम् ।
 य आश्वश्वा अमवद् वहन्त उतेशिरे अमृतस्य स्वराजः १
 त्वेषं गृणं तवसं खादिहस्तं धुनिव्रतं मायिनं दातिवारम् ।
 मयोभुवो ये अमिता महित्वा वन्दस्व विप्र तुविराधसो नृन् २
 आ वो यन्तूदवाहासौ अद्य वृष्टिं ये विश्वे मरुतो जुनन्ति ।
 अयं यो अग्निर्मरुतः समिद्ध एतं जुषध्वं कवयो युवानः ३
 यूयं राजानमिर्युं जनाय विभ्वतष्टं जनयथा यजत्राः ।
 युष्मदैति मुष्टिहा बाहुजूतो युष्मत् सदश्वो मरुतः सुवीरः ४
 अरा इवेदचरमा अहैव प्रप्र जायन्ते अकवा महौभिः ।
 पृश्नेः पुत्रा उपमासो रभिष्टाः स्वया मत्या मरुतः सं मिमिक्षुः ५
 यत् प्रायासिष्ट पृषतीभिरश्वैर्वीळुपविभिर्मरुतो रथैभिः ।
 क्षोदन्त आपो रिणते वना न्यवोस्त्रियो वृषभः क्रन्दतु द्यौः ६
 प्रथिष्ट यामन् पृथिवी चिदेषां भर्तैव गर्भं स्वमिच्छवौ धुः ।
 वातान् ह्यश्वान् धुर्यायुयुजे वर्षं स्वेदं चक्रिरे रुद्रियासः ७
 ह्ये नरो मरुतो मृळता न स्तुवीमघासो अमृता ऋतज्ञाः ।

सत्यंश्रुतः कर्वयो युवानो बृहद्भिरयो बृहदुक्षमाणाः ८

(५६) एकोनषष्टितमं सूक्तम्

(१-८) अष्टर्चस्यास्य सूक्तस्यात्रेयः श्यावाश्च ऋषिः । मरुतो देवताः । (१-७)

प्रथमादिसप्तर्चा जगती, (८) अष्टम्याश्च त्रिष्टुप् छन्दसी
प्र वः स्पळक्रन् त्सुविताय दावने ऽर्चा दिवे प्र पृथिव्या ऋतं भरे ।
उक्षन्ते अश्वान् तरुषन्त आ रजो ऽनु स्वं भानुं श्रथयन्ते अर्णवैः १
अमादिषां इभयसा भूमिरेजति नौर्न पूर्णा क्षरति व्यथिर्यती ।
दूरेदृशो ये चितयन्त एमभि रन्तर्महे विदथे येतिरे नरः २
गवामिव श्रियसे शृङ्गमुत्तमं सूर्यो न चक्षु रजसो विसर्जने ।
अत्या इव सुभ्वश्शारवः स्थन मर्या इव श्रियसे चेतथा नरः ३
को वो महान्ति महतामुदशनवत् कस्काव्या मरुतः को ह पौस्या ।
यूयं ह भूमिं किरणं न रैजथ प्र यद् भरध्वे सुविताय दावने ४
अश्वा इवेदरुषासः सर्बन्धवः शूरा इव प्रयुधः प्रोत युयुधुः ।
मर्या इव सुवृधो वावृधुर्नरः सूर्यस्य चक्षुः प्र मिनन्ति वृष्टिभिः ५
ते अज्येष्ठा अकनिष्ठास उद्भिदो ऽमध्यमासो महसा वि वावृधुः ।
सुजातासो जनुषा पृश्निमातरो दिवो मर्या आ नो अच्छा जिगातन ६
वयो न ये श्रेणीः पपुरोजसा ऽन्तान् दिवो बृहतः सानुनस्परि ।
अश्वास एषामुभये यथा विदुः प्र पर्वतस्य नभनूरचुच्यवुः ७
मिमातु द्यौरदितिर्वीतये नः सं दानुचित्रा उषसो यतन्ताम् ।
आचुच्यवुर्दिव्यं कोशमेत ऋषे रुद्रस्य मरुतो गृणानाः ८

(६०) षष्टितमं सूक्तम्

(१-८) अष्टर्चस्यास्य सूक्तस्यात्रेयः श्यावाश्च ऋषिः । मरुतोऽग्रामरुतौ वा देवते ।

(१-६) प्रथमादितृचद्वयस्य त्रिष्टुप्, (७-८) सप्तम्यष्टम्योर्ऋचोश्च जगती छन्दसी
ईळे अग्निं स्वर्वसं नमोभि रिह प्रसत्तो वि चयत् कृतं नः ।
रथैरिव प्र भरे वाजयद्भिः प्रदक्षिणिन्मरुतां स्तोममृध्याम् १
आ ये तस्थुः पृषतीषु श्रुतासु सुखेषु रुद्रा मरुतो रथेषु ।
वनां चिदुग्रा जिहते नि वो भिया पृथिवी चिद् रेजते पर्वतश्चित् २
पर्वतश्चिन्महि वृद्धो बिभाय दिवश्चित् सानु रेजत स्वने वः ।

यत् क्रीळथ मरुत ऋष्टिमन्त आप इव सध्वयञ्चो धवध्वे ३
 वरा इवेद् रैवतासो हिरंगयै रभि स्वधाभिस्तन्वः पिपिश्रे ।
 श्रिये श्रेयांसस्तवसो रथेषु सत्रा महांसि चक्रिरे तनूषु ४
 अज्येष्ठासो अकनिष्ठास एते सं भ्रातरो वावृधुः सौभगाय ।
 युवा पिता स्वपा रुद्र एषां सुदुघा पृश्निः सुदिना मरुद्भ्यः ५
 यदुत्तमे मरुतो मध्यमे वा यद् वावमे सुभगासो दिवि छ ।
 अतो नो रुद्रा उत वा न्वशस्या ग्रै वित्ताद्धविषो यद् यजाम ६
 अग्निश्च यन्मरुतो विश्ववेदसो दिवो वहध्व उत्तरादधि ष्णुभिः ।
 ते मन्दसाना धुनयो रिशादसो वामं धत्त यजमानाय सुन्वते ७
 अग्रै मरुद्भिः शभयद्भिर्ऋक्वभिः सोमं इंपब मन्दसानो गणश्रिभिः ।
 पावकेभिर्विश्वमिन्वेभिरायुभिर्वै श्वानर प्रदिवा केतुना सजूः ८

(६१) एकषष्टितमं सूक्तम्

(१-१६) एकोनविंशत्यृचस्यास्य सूक्तस्यात्रेयः श्यावाश्च ऋषिः । (१-४, ११-१६)
 प्रथमादिचतुर्ऋचामेकादश्यादिषण्णाञ्च मरुतः, (५-८) पञ्चम्यादिचतसृणां
 तरन्तमहिषी शशीयसी, (९) नवम्या वैददश्विः पुरुमीळहः, (१०) दशम्या
 वैददश्विस्तरन्तः, (१७-१६) सतदश्यादितृचस्य च दाभ्यो रथवीतिर्देवताः । (१-
 ४, ६-८, १०-११) प्रथमादिचतुर्ऋचां षष्ठ्यादितृचस्य दशम्यादिद्वादशानाञ्च गायत्री,
 (५) पञ्चम्या अनुष्टुप्, (९) नवम्याश्च सतोबृहती छन्दांसि
 के ष्ठा नरः श्रेष्ठतमा य एकैक आयुय । पुरमस्याः परावतः १
 क्वश वोऽश्वाः क्वाइभीशिवः कथं शैक कथा यय । पृष्ठे सदो नसोर्यमः २
 जघने चोद एषां वि सक्थानि नरो यमुः । पुत्रकृथे न जनयः ३
 परा वीरास एतन् मर्यासो भद्रजानयः । अग्नितपो यथासथ ४
 सन्त् साश्वयं पशु मुत गव्यं शतावयम् ।
 श्यावाश्चस्तुताय या दोर्वीरायोपबर्बहत् ५
 उत त्वा स्त्री शशीयसी पुंसो भवति वस्यसी । अदेवत्रादराधसः ६
 वि या जानाति जसुरिं वि तृष्यन्तं वि कामिनम् । देवत्रा कृणुते मनः ७
 उत घा नेमो अस्तुतः पुमाँ इति ब्रुवे पणिः । स वैरदेय इत् समः ८
 उत मैऽरपद् युवतिर्मन्दुषी प्रति श्यावाय वतनिम् ।
 वि रोहिता पुरुमीळहाय येमतु विप्राय दीर्घयशसे ९

यो मे धेनूनां शतं वैददश्चिर्यथा ददत् । तुरन्त इव मंहना १०
य ई वहन्त आशुभिः पिबन्तो मदिरं मधु । अत्र श्रवासि दधिरे ११
येषां इंश्रयाधि रोदसी विभ्राजन्ते रथेष्व । दिवि रुक्म इवोपरि १२
युवा स मारुतो गुणस्त्वेषरथो अनैद्यः । शुभंयावाप्रतिष्कृतः १३
को वैद नूनमेषां यत्रा मदन्ति धूतयः । ऋतजाता अरेपसः १४
यूयं मर्त विपन्यवः प्रणेतार इत्था धिया । श्रोतारो यामहूतिषु १५
ते नो वसूनि काम्या पुरुश्चन्द्रा रिशादसः । आ यज्ञियासो ववृत्तन १६
एतं मे स्तोर्मूर्म्ये दाभ्याय परा वह । गिरौ देवि रथीरिव १७
उत मे वोचतादिति सुतसोमे रथवीतौ । न कामो अप वेति मे १८
एष क्षेति रथवीति मघवा गोमतीरनु । पर्वतेष्वपश्रितः १९

६२) द्विषष्टितमं सूक्तम्

(१-६) नवर्चस्यास्य सूक्तस्यात्रेयः श्रुतविदृषिः । मित्रावरुणौ देवते ।

त्रिष्टुप् छन्दः

ऋतेन ऋतमपिहितं ध्रुवं वां सूर्यस्य यत्र विमुचन्त्यश्चान् ।
दशं शता सह तस्थुस्तदेकं देवानां श्रेष्ठं वपुषामपश्यम् १
तत् सु वां मित्रावरुणा महित्व मीर्मा तस्थुषीरहभिर्दुदुहे ।
विश्वाः पिन्वथः स्वसरस्य धेना अनु वामेकः पविरा ववर्त २
अधारयतं पृथिवीमुत द्यां इमत्रराजाना वरुणा महौभिः ।
वर्धयतमोषधीः पिन्वतं गा अवं वृष्टिं सृजतं जीरदानू ३
आ वामश्वासः सुयुजो वहन्तु यतरश्मय उप यन्त्वर्वाक् ।
घृतस्य निर्णिगनु वर्तते वामुप सिन्धवः प्रदिवि क्षरन्ति ४
अनु श्रुताममतिं वर्धदुर्वी बर्हिरिव यजुषा रक्षमाणा ।
नमस्वन्ता धृतदक्षाधि गर्ते मित्रासाथे वरुणेळास्वन्तः ५
अक्रविहस्ता सुकृतै परस्या यं त्रासाथे वरुणेळास्वन्तः ।
राजाना क्षत्रमहणीयमाना सहस्रस्थूणं इंबभृथः सह द्वौ ६
हिरण्यनिर्णिगयो अस्य स्थूणा वि भ्राजते दिव्यश्चाजनीव ।
भद्रे क्षेत्रे निर्मिता तिल्विले वा सनेम् मध्वो अधिगर्त्यस्य ७
हिरण्यरूपमुषसो व्युष्टा वयःस्थूणमुदिता सूर्यस्य ।
आ रोहथो वरुण मित्र गर्त मर्तश्चक्षाथे अदितिं दितिं च ८

यद् बंहिष्ठं नातिविधे सुदानू अच्छिद्रं शर्म भुवनस्य गोपा ।
तेन नो मित्रावरुणावविष्टं सिषासन्तो जिगीवांसः स्याम ६

चतुर्थोऽध्यायः

व० १ । ३६

(६३) त्रिषष्टितमं सूक्तम्

(१-७) सप्तर्चस्यास्य सूक्तस्यात्रेयोऽर्चनाना ऋषिः । मित्रावरुणौ देवते ।

जगती छन्दः

ऋतस्य गोपावधि तिष्ठथो रथं सत्यधर्माणा परमे व्यौमनि ।
यमत्र मित्रावरुणावथो युवं तस्मै वृष्टिर्मधुमत् पिन्वते दिवः १
सम्राजावस्य भुवनस्य राजथो मित्रावरुणा विदथे स्वर्दृशा ।
वृष्टिं वां राधौ अमृतत्वमीमहे द्यावापृथिवी वि चरन्ति तन्यवः २
सम्राजा उग्रा वृषभा दिवस्पती पृथिव्या मित्रावरुणा विचर्षणी ।
चित्रेभिरभैरुप तिष्ठथो रवं द्यां वर्षयथो असुरस्य मायया ३
माया वा मित्रावरुणा दिवि श्रिता सूर्यो ज्योतिश्चरति चित्रमायुधम् ।
तमभ्रेण वृष्ट्या गूहथो दिवि पर्जन्य द्रप्सा मधुमन्त ईरते ४
रथं युञ्जते मरुतः शभे सुखं शूरो न मित्रावरुणा गविष्टिषु ।
रजांसि चित्रा वि चरन्ति तन्यवो दिवः सम्राजा पर्यसा न उन्नतम् ५
वाचं सु मित्रावरुणाविरावतीं पर्जन्यश्चित्रां वदति त्विषीमतीम् ।
अभ्रा वसत मरुतः सु मायया द्यां वर्षयतमरुणाम रेपसम् ६
धर्मणा मित्रावरुणा विपश्चिता वृता रक्षेथे असुरस्य मायया ।
ऋतेन विश्वं भुवनं वि राजथः सूर्यमा धत्थो दिवि चित्र्यं रथम् ७

(६४) चतुःषष्टितमं सूक्तम्

(१-७) सप्तर्चस्यास्य सूक्तस्यात्रेयोऽर्चनाना ऋषिः । मित्रावरुणौ देवते । (१-६)

प्रथमादिषड्चामनुष्टुप् , (७) सप्तम्याश्च पङ्क्तिश्छन्दसी

वरुणं वो रिशादस मृचा मित्रं हवामहे ।
परि वृजेव ब्राह्मो र्जगन्वासा स्वर्णरम् १
ता ब्राहवा सुचेतुना प्र यन्तमस्मा अर्चते ।
शेवं हि जार्यं वां विश्वासु द्वासु जोगुवे २

यन्नूनमृश्यां गतिं मित्रस्य यायां पृथा ।
 अस्य प्रियस्य शर्मण्य हिंसानस्य सञ्चिरे ३
 युवाभ्यां इमत्रावरुणो पुमं धैयामृचा ।
 यद्ध क्षयै मृघोनां स्तोतृणां च स्पुर्धसै ४
 आ नौ मित्र सुदीति भिर्वरुणश्च सधस्थ आ ।
 स्वे क्षयै मृघोनां सखीनां च वृधसै ५
 युवं नो येषु वरुण क्षत्रं बृहच्च बिभृथः ।
 उरु णो वाजसातये कृतं राये स्वस्तये ६
 उच्छन्त्यां मे यजता देवक्षत्रे रुशद्गवि ।
 सुतं सोमं न हस्तिभि रा पडिभर्धावतं नरा बिभ्रतावर्चनानसम् ७

(६५) पञ्चषष्टितमं सूक्तम्

(१-६) षड्चस्यास्य सूक्तस्यात्रेयो रातहव्य ऋषिः । मित्रावरुणौ देवते । (१-५)

प्रथमादिपञ्चार्चामनुष्टुप् , (६) षष्ठ्याश्च पङ्क्तिश्छन्दसी

यश्चिकेत स सुक्रतु देवत्रा स ब्रवीतु नः ।
 वरुणो यस्य दर्शतो मित्रो वा वनते गिरः १
 ता हि श्रेष्ठवर्चसा राजाना दीर्घश्रुत्तमा ।
 ता सत्पती ऋतावृध ऋतावाना जनैजने २
 ता वामियानोऽवसे पूर्वा उपे ब्रुवे सचा ।
 स्वश्वासः सु चेतुना वाजां अभि प्र दावने ३
 मित्रो अंहोश्चिदादुरु क्षयाय गातुं वनते ।
 मित्रस्य हि प्रतूर्वतः सुमतिरस्ति विधतः ४
 वयं मित्रस्यावसि स्याम सप्रथस्तमे ।
 अनेहसस्त्वोतयः सत्रा वरुणशेषसः ५
 युवं इमत्रेमं जनं यतथः सं च नयथः ।
 मा मृघोनः परि ख्यतं मो अस्माकमृषीणा गोपीथे न उरुष्यतम् ६

(६६) षट्षष्टितमं सूक्तम्

(१-६) षड्चस्यास्य सूक्तस्यात्रेयो रातहव्य ऋषिः । मित्रावरुणौ देवते ।

अनुष्टुप् छन्दः

आ चिकितान सुक्रतू देवौ मर्त रिशादसा ।
 वरुणाय ऋतपेशसे दधीत प्रयसे महे १
 ता हि क्षत्रमविहृतं सम्यगसुर्यश्माशाति ।
 अर्धं वृतेव मानुषं स्वर्णं धायि दर्शतम् २
 ता वामेषे रथाना मुर्वी गव्यूतिमेषाम् ।
 रातहव्यस्य सुष्टतिं दधृक् स्तोमैर्मनामहे ३
 अधा हि काव्यो युवं दक्षस्य पूर्भिरद्भुता ।
 नि केतुना जनानां चिकेथे पूतदक्षसा ४
 तदृतं पृथिवि बृहच्छृचफट्टवएष ऋषीणाम् ।
 ज्ञयसानावरं पृथ्वति क्षरन्ति यामभिः ५
 आ यद् वामीयचक्षसा मित्रं वयं च सूरयः ।
 व्यचिष्टे बहुपाय्ये यतैमहि स्वराज्यै ६

(६७) सप्तषष्ठितमं सूक्तम्

(१-५) पञ्चर्चस्यास्य सूक्तस्यात्रेयो यजत ऋषिः । मित्रावरुणौ देवते ।

अनुष्टुप् छन्दः

बळित्था देव निष्कृत मादित्या यजतं बृहत् ।
 वरुण मित्रार्यमन् वर्षिष्ठं क्षत्रमाशाथे १
 आ यद् योनिं हिरण्ययुं वरुण मित्रं सदथः ।
 धर्तारां चर्षणीनां यन्तं सुम्नं रिशादसा २
 विश्वे हि विश्ववेदसो वरुणो मित्रो अर्यमा ।
 वृता पदेव सश्चिरे पान्ति मर्त्यं रिषः ३
 ते हि सत्या ऋतस्पृशं ऋतावानो जनैजने ।
 सुनीथासः सुदानवो ऽहोश्चिदुरुचक्रयः ४
 को नु वां इमत्रास्तुतो वरुणो वा तनूनाम् ।
 तत् सु वामेषते मृति रत्रिभ्य एषते मृतिः ५

(६८) अष्टषष्ठितमं सूक्तम्

(१-५) पञ्चर्चस्यास्य सूक्तस्यात्रेयो यजत ऋषिः । मित्रावरुणौ देवते ।

गायत्री छन्दः

प्र वौ मित्राय गायत वरुणाय विपा गिरा । महिन्नत्रावृतं बृहत् १
सम्राजा या घृतयौनी मित्रश्चोभा वरुणश्च । देवा देवेषु प्रशस्ता २
ता नः शक्तं पार्थिवस्य महो रायो दिव्यस्य । महि वां क्षत्रं देवेषु ३
ऋतमृतेन सर्पन्ते षिरं दक्षमाशाते । अद्भुहा देवौ वर्धेते ४
वृष्टिद्यावा रीत्यापि षस्पती दानुमत्याः । बृहन्तं गर्तमाशाते ५

(६६) एकोनसप्ततितमं सूक्तम्

(१-४) चतुर्ऋचस्यास्य सूक्तस्यात्रेय उरुचक्रिर्ऋषिः । मित्रावरुणौ देवते ।
त्रिष्टुप् छन्दः

त्री रोचना वरुण त्रीरुत द्यून् त्रीणि मित्र धारयथो रजांसि ।
वावृधानावमतिं क्षत्रियस्याऽनु वृतं रक्षमाणावजुर्यम् १
इरावतीवरुण धेनवौ वां मधुमद् वां सिन्धवो मित्र दुहे ।
त्रयस्तस्थुर्वृषभासस्तिसृणां धिषर्णानां रेतोधा वि द्युमन्तः २
प्रातर्देवीमदितिं जोहवीमि मध्यंदिन उदिता सूर्यस्य ।
राये मित्रावरुणा सर्वताते ळे तोकाय तनयाय शं योः ३
या धर्तारा रजसो रोचनस्यो तादित्या दिव्या पार्थिवस्य ।
न वां देवा अमृता आ मिनन्ति वृतानि मित्रावरुणा ध्रुवाणि ४

(७०) सप्ततितमं सूक्तम्

(१-४) चतुर्ऋचस्यास्य सूक्तस्यात्रेय उरुचक्रिर्ऋषिः । मित्रावरुणौ देवते ।
गायत्री छन्दः

पुरूरुणा चिद्धयस्त्य वौ नूनं वां वरुण । मित्र वंसि वां सुमतिम् १
ता वां सम्यगद्ब्रुहाणे षमश्याम धार्यसे । वयं ते रुद्रा स्याम २
पातं नौ रुद्रा पायुभि रूत त्रायेथां सुत्रात्रा । तुर्याम दस्यून् तनूभिः ३
मा कस्याद्भुतक्रतू यक्षं भुजेमा तनूभिः । मा शेषसा मा तनसा ४

(७१) एकसप्ततितमं सूक्तम्

(१-३) तृचस्यास्य सूक्तस्यात्रेयो बाहुवृक्त ऋषिः । मित्रावरुणौ देवते ।
गायत्री छन्दः

आ नौ गन्तं रिशादसा वरुण मित्रं बर्हणा । उपेमं चारुमध्वरम् १

विश्वस्य हि प्रचेतसा वरुण मित्र राजथः । ईशाना पिप्यतं धियः २
उप नः सुतमा गतं वरुण मित्रं दाशुषः । अस्य सोमस्य पीतये ३

(७२) द्विसप्ततितमं सूक्तम्

(१-३) तृचस्यास्य सूक्तस्यात्रेयो बाहुवृक्त ऋषिः ।

मित्रावरुणौ देवते । उष्णिक् छन्दः

आ मित्रे वरुणे वयं गीर्भिर्जुहुमो अत्रिवत् । नि बर्हिषि सदतं सोमपीतये १
वृतेन स्थो ध्रुवक्षेमा धर्मणा यातयज्जना । नि बर्हिषि सदतं सोमपीतये २
मित्रश्च नो वरुणश्च जुषेतां यज्ञमिष्टये । नि बर्हिषि सदतां सोमपीतये ३

षष्ठोऽनुवाकः

सू० ७३ ।८७

(७३) त्रिसप्ततितमं सूक्तम्

(१-१०) दशर्चस्यास्य सूक्तस्यात्रेयः पौर ऋषिः । अश्विनौ देवते । अनुष्टुप् छन्द
यदद्य स्थः परावति यदवावत्यश्विना । यद् वा पुरु पुरुभुजा यदन्तरिक्षा आ
गतम् १

इह त्या पुरुभूतमा पुरु दंसांसि बिभ्रता । वरस्या याम्यधिगू हुवे तुविष्टमा
भुजे २

ईमान्यद् वपुषे वपुश्चक्रं रथस्य येमथुः । पर्यन्या नाहुषा युगा म्हा रजांसि
दीयथः ३

तद् षु वामेना कृतं विश्वा यद् वामनु ष्वै । नानां जातावरेपसा समस्मे
बन्धुमेयथुः ४

आ यद् वा सूर्या रथं तिष्ठद् रघुष्यदं सदा । परि वामरुषा वयो घृणा वरन्त
आपः ५

युवोरत्रिश्चिकेतति नरा सुप्ने चेतसा । घर्म यद् वामरेपसं नासत्यास्त्रा
भुरयति ६

उग्रो वा ककुहो ययिः शृणवे यामेषु संतनिः । यद् वां
दंसौभिरश्विना ऽत्रिर्नराववर्तति ७

मध्वं ऊ षु मधूयुवा रुद्रा सिषक्ति पिप्युषी । यत् समुद्राति पर्षथः पुक्वाः

पृ॒क्षो॑ भरन्त वाम् ८

स॒त्यमि॒द् वा उ॑ अ॒श्विना॑ यु॒वामा॑ह॒र्मयो॑भुवा । ता यामन् याम॒हूत॑मा॒ याम॒न्ना
मृ॒ळय॑त्त॒मा ९

इ॒मा ब्र॒ह्मा॑णि॒ व॒र्धना॑ ऽश्विभ्यां सन्तु श॒न्त॑मा । या त॒क्षाम् रथा॑ इ॒वा ऽवो॑चाम
बृ॒हन्न॑मः १०

(७४) चतुःसप्ततितमं सूक्तम्

(१-१०) दशर्चस्यास्य सूक्तस्यात्रेयः पौर ऋषिः । अश्विनौ देवते । अनुष्टुप् छन्दः
कू॒ष्ठो दे॒वाव॑श्विना॒ ऽद्या दि॒वो म॑नावसू । तच्छ्र॒वथो॑ वृषणवसू अ॒त्रि॒र्वा॒मा
वि॒वास॑ति १

कु॒ह॒ त्या कु॒ह॒ नु श्रु॑ता दि॒वि दे॒वा ना॑सत्या । कस्मि॒न्ना य॑तथो जने॒ को वा॑
न॒दीनां॑ स॒र्चा २

कं या॑थः कं हं गच्छ॑थः कमच्छा॑ यु॒ञ्जाथे॑ रथम् । कस्य॒ ब्रह्मा॑णि रणयथो व॒यं
वा॑मु॒श्मसी॑ष्टये ३

पौरं॑ चि॒द्धयु॑दप्रु॒तं पौरं॑ पौराय॒ जिन्व॑थः । यदी॑ गृ॒भीत॑ता॒तये॑ सि॒ंहमि॑व दु॒हस्प॑दे
४

प्र च्य॑वा॒नाञ्जु॑रुषो॑ व॒त्रिम॑त्कं न मुञ्चथः । यु॒वा यदी॑ कृ॒थः पु॒न॒ रा
का॑ममृ॒गवे॑ व॒ध्वः ५

अ॒स्ति हि॑ वा॒मि॒ह स्तो॑ता स्मसि॑ वां स॒न्दृशि॑ श्रि॒ये । नू श्रु॑तं म॒ आ
ग॑त॒ मवो॑भि॒र्वाजि॑नीवसू ६

को वा॑म॒द्य पु॑रू॒णा मा वे॒न्ने म॑त्या॒नाम् । को वि॒प्रो वि॒प्रवा॑हसा॒ को
य॒ज्ञैर्वा॑जिनीवसू ७

आ वां॑ रथो॒ रथानां॑ ये॒ष्टो या॑त्वश्विना । पु॒रू चि॑दस्म॒युस्ति॑र आ॒ङ्गुषो॑ म॒र्त्येष्वा
८

श॒मू षु॑ वा॑ मधू॒युवा॑ ऽस्माक॑मस्तु च॒र्कृ॒तिः । अ॒र्वा॒ची॒ना वि॑चेतसा॒ विभिः॑
श्ये॒नेव॑ दीयतम् ९

अ॒श्विना॑ यद्ध॒ कर्हि॑ चि॒च्छु॑श्रूया॒तमि॑मं ह॒वम् । व॒स्वी॒रू षु॑ वां भु॒जः पृ॒ञ्चन्ति॑
सु वां॑ पृ॒चः १०

(७५) पञ्चसप्ततितमं सूक्तम्

(१-६) नवर्चस्यास्य सूक्तस्यात्रेयोऽवस्युर्ऋषिः । अश्विनौ देवते । पङ्क्तिश्छन्दः
 प्रति प्रियतमं रथं वृषणं वसुवाहनम् ।
 स्तोता वामश्विनावृषिः स्तोमैनु प्रति भूषति माध्वी मम श्रुतं हवम् १
 अत्यायातमश्विना तिरो विश्वा अहं सना ।
 दस्त्रा हिरण्यवर्तनी सुषुम्ना सिन्धुवाहसा माध्वी मम श्रुतं हवम् २
 आ नो रत्नानि बिभ्र तावश्विना गच्छतं युवम् ।
 रुद्रा हिरण्यवर्तनी जुषाणा वाजिनीवसू माध्वी मम श्रुतं हवम् ३
 सुष्टुभौ वां वृषणवसू रथे वाणीच्याहिता ।
 उत वां ककुहो मृगः पृक्षः कृणोति वापुषो माध्वी मम श्रुतं हवम् ४
 बोधिन्मनसा रथ्यै षिरा हवनश्रुता ।
 विभिश्चयवानमश्विना नि याथो अद्वयाविनं माध्वी मम श्रुतं हवम् ५
 आ वां नरा मनोयुजो ऽश्वासः पुषितप्सवः ।
 वयौ वहन्तु पीतयै सह सुप्नेभिरश्विना माध्वी मम श्रुतं हवम् ६
 अश्विनावेह गच्छतं नासत्या मा वि वैनतम् ।
 तिरश्चिदर्यया परि वर्तिर्यातमदाभ्या माध्वी मम श्रुतं हवम् ७
 अस्मिन् युजे अदाभ्या जरितारं शुभस्पती ।
 अवस्युर्मश्विना युवं गृणन्तमुप भूषथो माध्वी मम श्रुतं हवम् ८
 अभूदुषा रुशत्यश राग्निरधाय्यृत्वियः ।
 अर्योजि वां वृषणवसू रथौ दस्त्रावमर्त्यो माध्वी मम श्रुतं हवम् ९

(७६) षट्सप्ततितमं सूक्तम्

(१-५) पञ्चर्चस्यास्य सूक्तस्य भौमोऽत्रिर्ऋषिः । अश्विनौ देवते । त्रिष्टुप् छन्दः
 आ भात्यग्निरुषसामनीक मुद् विप्राणां देव्या वाचौ अस्थुः ।
 अर्वाञ्चा नूनं रथ्येह यातं पीपिवांसमश्विना घर्ममच्छ १
 न संस्कृतं प्र मिमीतो गमिष्ठा ऽन्ति नूनमश्विनोपस्तुतेह ।
 दिवाभिपित्वेऽवसागमिष्ठा प्रत्यवर्ति दाशुषे शंभविष्ठा २
 उता यातं संगवे प्रातरहो मध्यन्दिन उदिता सूर्यस्य ।
 दिवा नक्तमवसा शतमेन नेदानी पीतिरश्विना ततान ३
 इदं हि वां प्रदिवि स्थानमोक इमे गृहा अश्विनेदं दुरोगम् ।

आ नो दिवो बृहत्ः पर्वतादा ऽद्भ्यो यातमिषमूर्जं वहन्ता ४
समश्विनोरवसा नूतनेन मयोभुवा सुप्रणीती गमेम ।
आ नो रयिं वहतमोत वीरा ना विश्वान्यमृता सौभंगानि ५

(७७) सप्तसप्ततितमं सूक्तम्

(१-५) पञ्चर्चस्यास्य सूक्तस्य भौमोऽत्रिर्ऋषिः । अश्विनौ देवते । त्रिष्टुप् छन्दः
प्रातर्यावाणा प्रथमा यजध्वं पुरा गृध्रादररुषः पिबातः ।
प्रातर्हि यज्ञमश्विना दधाते प्र शंसन्ति क्वयः पूर्वभाजः १
प्रातर्यजध्वमश्विना हिनोत न सायमस्ति देवया अजुष्टम् ।
उतान्यो अस्मद् यजते वि चावः पूर्वःपूर्वो यजमानो वनीयान् २
हिरण्यत्वङ्मधुवर्णो घृतस्तुः पृक्षो वहन्ना रथो वर्तते वाम् ।
मनोजवा अश्विना वार्तरंहा येनातियाथो दुरितानि विश्वा ३
यो भूर्यिष्टं नासत्याभ्यां विवेषु चनिष्टं इंपत्वो ररते विभागे ।
स लोकमस्य पीपरच्छमीभि रनूर्ध्वभासः सदमित् तुतुर्यात् ४
समश्विनोरवसा नूतनेन मयोभुवा सुप्रणीती गमेम ।
आ नो रयिं वहतमोत वीरा ना विश्वान्यमृता सौभंगानि ५

(७८) अष्टसप्ततितमं सूक्तम्

(१-६) नवर्चस्यास्य सूक्तस्यात्रेयः सप्तवध्निर्ऋषिः । अश्विनौ देवते । (१-३)
प्रथमादितृचस्योष्णिक, (४) चतुर्थ्या ऋचस्त्रिष्टुप्, (५-६)
पञ्चम्यादिपञ्चानाञ्चानुष्टुप् छन्दांसि
अश्विनावेह गच्छतं नासत्या मा वि वैनतम् । हंसाविव पततमा सुताँ उप १
अश्विना हरिणाविव गौराविवानु यवसम् । हंसाविव पततमा सुताँ उप २
अश्विना वाजिनीवसू जुषेथा यज्ञमिष्टये । हंसाविव पततमा सुताँ उप ३
अत्रिर्यद् वामवरोहन्नुबीस मजौहवीन्नाधमानेव योषा ।
श्येनस्य चिज्जवसा नूतनेना ऽऽगच्छतमश्विना शंतमेन ४
वि जिहीष्व वनस्पते योनिः सूर्ष्यन्त्या इव ।
श्रुतं मे अश्विना हव सप्तवध्निं च मुञ्चतम् ५
भीताय नाधमानाय ऋषये सप्तवधये ।

मायाभिरश्विना युवं वृक्षं सं च वि चाचथः ६
 यथा वार्तः पुष्करिणीं समिङ्गयति सर्वतः ।
 एवा ते गर्भं एजतु निरैतु दशमास्यः ७
 यथा वातो यथा वनं यथा समुद्र एजति ।
 एवा त्वं दशमास्य सहावैहि जरायुणा ८
 दश मासाञ्छशयानः कुमारो अर्धि मातरि ।
 निरैतु जीवो अक्षतो जीवो जीवन्त्या अर्धि ९

(७९) एकोनाशीतितमं सूक्तम्

(१-१०) दशर्चस्यास्य सूक्तस्यात्रेयः सत्यश्रवा ऋषिः । उषा देवता । पङ्क्तिश्छन्दः
 महे नो अद्य बौधयोषो राये दिवित्मती ।
 यथा चिन्नो अबोधयः सत्यश्रवसि वाय्ये सुजाते अश्वसूनृते १
 या सुनीथे शौचद्रथे व्यौच्छौ दुहितर्दिवः ।
 सा व्युच्छ सहीयसि सत्यश्रवसि वाय्ये सुजाते अश्वसूनृते २
 सा नो अद्याभ्रद्वसु व्युच्छा दुहितर्दिवः ।
 यो व्यौच्छः सहीयसि सत्यश्रवसि वाय्ये सुजाते अश्वसूनृते ३
 अभि ये त्वा विभावरि स्तोमैर्गृणन्ति वह्नयः ।
 मघैर्मघोनि सुश्रियो दामन्वन्तः सुरातयः सुजाते अश्वसूनृते ४
 यच्चिद्धि तै गृणा इमे छदयन्ति मघत्तये ।
 परि चिद् वष्टयो दधु र्ददतो राधो अहयं सुजाते अश्वसूनृते ५
 ऐषु धा वीरवद् यश उषो मघोनि सूरिषु ।
 ये नो राधांस्यहया मघवानो अरासत सुजाते अश्वसूनृते ६
 तेभ्यो द्युमं बृहद् यश उषो मघोन्या वह ।
 ये नो राधांस्यश्वद्या गव्या भजन्त सूरयः सुजाते अश्वसूनृते ७
 उत नो गोमतीरिषु आ वहा दुहितर्दिवः ।
 साकं सूर्यस्य रश्मिभिः शक्रैः शोचद्भिरर्चिभिः सुजाते अश्वसूनृते ८
 व्युच्छा दुहितर्दिवो मा चिरं तनुथा अपः ।
 नेत् त्वा स्तेनं यथा रिपुं तपाति सूरौ अर्चिषा सुजाते अश्वसूनृते ९
 एतावद् वेदुषस्त्वं भूयो वा दातुमर्हसि ।
 या स्तोतृभ्यो विभावर्युच्छन्ती न प्रमीयसे सुजाते अश्वसूनृते १०

(८०) अशीतितमं सूक्तम्

(१-६) षडृचस्यास्य सूक्तस्यात्रेयः सत्यश्रवा ऋषिः । उषा देवता । त्रिष्टुप् छन्दः
 द्युतद्यामानं बृहतीमृतेन ऋतावरीमरुणप्सुं विभातीम् ।
 देवीमुषसं स्वरावहेन्तीं प्रति विप्रांसो मतिभिर्जरन्ते १
 एषा जनं दर्शता बोधयन्ती सुगान् पथः कृणवती यात्यग्रे ।
 बृहद्रथा बृहती विश्वमिन्वो षा ज्योतिर्यच्छत्यग्रे अहाम् २
 एषा गोभिररुणेभिर्युजाना ऽस्त्रैधन्ती रयिमप्रायु चक्रे ।
 पथो रदन्ती सुविताय देवी पुरुष्टुता विश्ववारा वि भाति ३
 एषा व्यैनी भवति द्विबर्हा आविष्कृणवाना तन्वं पुरस्तात् ।
 ऋतस्य पन्थामन्वेति साधु प्रजानतीव न दिशौ मिनाति ४
 एषा शभ्रा न तन्वो विदानो ध्वेवं स्नाती दृशये नो अस्थात् ।
 अप द्वेषो बाधमाना तमांस्यु षा दिवो दुहिता ज्योतिषागात् ५
 एषा प्रतीची दुहिता दिवो नृन् योषैव भद्रा नि रिणीते अप्सः ।
 व्यूरवती दाशुषे वार्याणि पुनर्ज्योतिर्युवतिः पूर्वथाकः ६

(८१) एकाशीतितमं सूक्तम्

(१-५) पञ्चर्चस्यास्य सूक्तस्यात्रेयः श्यावाश्व ऋषिः । सविता देवता ।
 जगती छन्दः

युञ्जते मन उत युञ्जते धियो विप्रा विप्रस्य बृहतो विपश्चितः ।
 वि होत्रा दधे वयुनाविदेक इ न्मही देवस्य सवितुः परिष्टतिः १
 विश्वा रूपाणि प्रति मुञ्जते कविः प्रासावीद् भद्रं द्विपदे चतुष्पदे ।
 वि नाकमख्यत् सविता वरेण्यो ऽनु प्रयाणमुषसो वि राजति २
 यस्य प्रयाणमन्वन्य इद् ययु देवा देवस्य महिमानमोजसा ।
 यः पार्थिवानि विममे स एतशो रजांसि देवः सविता महित्वना ३
 उत यांसि सवितस्त्रीणि रोचनो त सूर्यस्य रश्मिभिः समुच्यसि ।
 उत रात्रीमुभयतः परीयस उत मित्रो भवसि देव धर्मभिः ४
 उतेशिषे प्रसवस्य त्वमेक इ दुत पूषा भवसि देव यामभिः ।
 उतेदं विश्वं भुवन् वि राजसि श्यावाश्वस्ते सवितु स्तोममानशे ४

(८२) द्व्यशीतितमं सूक्तम्

(१-६) नवर्चस्यास्य सूक्तस्यात्रेयः श्यावाश्च ऋषिः । सविता देवता । (१)
 प्रथमर्चोऽनुष्टुप् , (२-६) द्वितीयाद्यष्टानाञ्च गायत्री छन्दसी
 तत् सवितुर्वृणीमहे वयं देवस्य भोजनम् । श्रेष्ठं सर्वधातमं तुरं भगस्य
 धीमहि १
 अस्य हि स्वयंशस्तरं सवितुः कञ्चन प्रियम् । न मिनन्ति स्वराज्यम् २
 स हि रत्नानि दाशुषै सुवाति सविता भगः । तं भागं चित्रमीमहे ३
 अद्या नो देव सवितः प्रजावत् सावीः सौभगम् । परा दुःष्वप्रयं सुव ४
 विश्वानि देव सवित दुर्हितानि परा सुव । यद् भद्रं तन्न आ सुव ५
 अनागसो अदितये देवस्य सवितुः सवे । विश्वा वामानि धीमहि ६
 आ विश्वदैवं सत्पतिं सूक्तैरद्या वृणीमहे । सत्यसवं सवितारम् ७
 य इमे उभे अहनी पुर एत्यप्रयुच्छन् । स्वाधीर्देवः सविता ८
 य इमा विश्वा जाता न्याश्रावयति श्लोकैः । प्र च सुवाति सविता ९

(८३) त्र्यशीतितमं सूक्तम्

(१-१०) दशर्चस्यास्य सूक्तस्य भौमोऽत्रिर्ऋषिः । पर्जन्यो देवता । (१, ५-८,
 १०) प्रथमर्चः पञ्चम्यादिचतसृणां दशम्याश्च त्रिष्टुप् , (२-४) द्वितीयादितृचस्य
 जगती (६) नवम्याश्चानुष्टुप् छन्दांसि
 अच्छा वद तवसं गीर्भिराभिः स्तुहि पर्जन्यं नमसा विवास ।
 कनिक्रदद् वृषभो जीरदानू रेतो दधात्योषधीषु गर्भम् १
 वि वृक्षान् हन्त्युत हन्ति रक्षसो विश्वं इंबभाय भुवनं महावधात् ।
 उतानागा ईषते वृष्यावतो यत् पर्जन्यः स्तनयन् हन्ति दुष्कृतः २
 रथीव कश्याश्वा अभिज्ञिप न्नाविदूतान् कृणुते वृष्यांश्च अहं ।
 दूरात् सिंहस्य स्तनथा उदीरते यत् पर्जन्यः कृणुते वृष्यंश्च नभः ३
 प्र वाता वान्ति पतरन्ति विद्युत् उदोषधीर्जिहते पिन्वते स्वः ।
 इा विश्वस्मै भुवनाय जायते यत् पर्जन्यः पृथिवीं रेतसारति ४
 यस्य वृते पृथिवी ननमीति यस्य वृते शफवज्जर्भुरीति ।
 यस्य वृत ओषधीर्विश्वरूपाः स नः पर्जन्य महि शर्म यच्छ ५
 दिवो नो वृष्टिं मरुतो ररीध्वं प्र पिन्वत वृष्णो अश्वस्य धाराः ।
 अर्वाङ्ङितेन स्तनयित्बुनेह्यपो निषिञ्चन्नसुरः पिता नः ६

अभि क्रन्द स्तनय गर्भमा धा उदन्वता परि दीया रथेन ।
 दृतिं सु कर्ष विषितं न्यञ्चं समा भवन्तूद्वतो निपादाः ७
 महान्तं कोशमुदचा नि षिञ्च स्यन्दन्तां कुल्या विषिताः पुरस्तात् ।
 घृतेन द्यावापृथिवी व्युन्धि सुप्रपाणं भवत्वघ्नयाभ्यः ८
 यत् पर्जन्य कर्निक्रदत् स्तनयन् हंसि दुष्कृतः ।
 प्रतीदं विश्वं मोदते यत् किं च पृथिव्यामधि ९
 अर्षीर्षमुदु षू गृभाया ऽकधन्वान्यत्यैतवा उ ।
 अजीजन ओषधीर्भोजनाय कमुत प्रजाभ्योऽविदो मनीषाम् १०

(८४) चतुरशीतितमं सूक्तम्

(१-३) तृचस्यास्य सूक्तस्य भौमोऽत्रिर्ऋषिः । पृथिवी देवता । अनुष्टुप् छन्दः
 बळित्था पर्वतानां खिद्रं इंबभर्षि पृथिवि ।
 प्र या भूमिं प्रवत्वति महा जिनोषि महिनि १
 स्तोमासस्त्वा विचारिणि प्रति ष्टोभन्त्यक्तुभिः ।
 प्र या वाजं न हेषन्तं पेरुमस्यस्यर्जुनि २
 दृळहा चिद् या वनस्पतीन् दमया दर्धर्ष्योर्जसा ।
 यत् ते अभ्रस्यं विद्युतो दिवो वर्षन्ति वृष्टयः ३

(८५) पञ्चाशीतितमं सूक्तम्

(१-८) अष्टर्चस्यास्य सूक्तस्य भौमोऽत्रिर्ऋषिः । वरुणो देवता । त्रिष्टुप् छन्दः
 प्र सम्राजै बृहदर्चा गभीरं ब्रह्म प्रियं वरुणाय श्रुताय ।
 वि यो जघानं शमितेव चर्मोपस्तिरै पृथिवीं सूर्याय १
 वनेषु व्यश्नरिद्धं ततान् वाजमर्वत्सु पय उस्त्रियासु ।
 हत्सु क्रतुं वरुणो अप्स्वश्मिं दिवि सूर्यमदधात् सोममद्रौ २
 नीचीर्नबारं वरुणः कर्वन्धं प्र संसर्ज रोदसी अन्तरिक्षम् ।
 तेन विश्वस्य भुवनस्य राजा यवं न वृष्टिव्युनत्ति भूमि ३
 उनत्ति भूमिं पृथिवीमुत द्यां यदा दुग्धं वरुणो वष्टयादित् ।
 समभ्रेण वसत् पर्वतास स्तविषीयन्तः श्रथयन्त वीराः ४
 इमामू ष्वासुरस्यं श्रुतस्यं महीं मायां वरुणस्य प्र वोचम् ।
 मानैनेव तस्थिवाँ अन्तरिक्षे वि यो ममे पृथिवीं सूर्येण ५

इमामू नु क्वितमस्य मायां महीं देवस्य नकिरा दधर्ष ।
 एकं यदुदना न पृणन्त्येनी रासिञ्चन्तीरवनयः समुद्रम् ६
 अर्यम्यं वरुण मित्र्यं वा सखायं वा सदमिद्भ्रार्तरं वा ।
 वेशं वा नित्यं वरुणारणं वा यत् सीमागञ्चकृमा शिश्रथस्तत् ७
 कितवासो यद् रिरिपुर्न दीवि यद् वा घा सत्यमुत यन्न विद्य ।
 सर्वा ता वि ष्यं शिथिरेव देवाऽधा ते स्याम वरुण प्रियासः ८

(८६) षडशीतितमं सूक्तम्

(१-६) षडचस्यास्य सूक्तस्य भौमोऽत्रिर्ऋषिः । इन्द्राग्नी देवते । (१-५)

प्रथमादिपञ्चार्चामनुष्टुप् (६) षष्ठ्याश्च विराट्पूर्वा छन्दसी

इन्द्राग्नी यमवथ उभा वाजेषु मर्त्यम् ।
 दृळहा चित् स प्र भैदति द्युम्ना वाणीरिव त्रितः १
 या पृतनासु दुष्टरा या वाजेषु श्रवाय्या ।
 या पञ्च चर्षणीरर्भीन्द्राग्नी ता हवामहे २
 तयोरिदमवच्छव स्तिग्मा दिद्युन्मघोनोः ।
 प्रति द्रुणा गभस्त्योर्गवा वृत्रघ्न एषते ३
 ता वामेषु रथाना मिन्द्राग्नी हवामहे ।
 पती तुरस्य राधसो विद्वांसा गिर्वणस्तमा ४
 ता वृधन्तावनु द्यून् मर्ताय देवावदभा ।
 अर्हन्ता चित् पुरो दधेऽशैव देवाववर्ते ५
 एवेन्द्राग्निभ्यामहावि हव्यं शूष्यं घृतं न पूतमद्रिभिः ।
 ता सूरिषु श्रवौ बृहद् रयिं गृणत्सु दिधृतइ मर्षं गृणत्सु दिधृतम् ६

(८७) सप्ताशीतितमं सूक्तम्

(१-६) नवर्चस्यास्य सूक्तस्यात्रेय एवयामरुदृषिः । मरुतो देवताः ।

अतिजगती छन्दः

प्र वौ महे मतयो यन्तु विष्णावे मरुत्वते गिरिजा एवयामरुत् ।
 प्र शर्धाय प्रयज्यवे सुखादये तवसे भन्ददिष्टये धुनिव्रताय शर्वसे १
 प्र ये जाता महिना ये च नु स्वयं प्र विघना ब्रुवत एवयामरुत् ।
 क्रत्वा तद् वौ मरुतो नाधृषे शवौ दाना म्हा तदेषा मधृष्टासो नाद्रयः २

प्र ये दिवो बृहतः शृङ्गवरे गिरा सुशुक्वानः सुभ्वं एवयामरुत् ।
न येषामिरी सधस्थ ईष्ट आँ अग्रयो न स्वविद्युतः प्र स्पन्द्रासो धुनीनाम् ३
स चक्रमे महतो निरुक्रमः समानस्मात् सदस एवयामरुत् ।
यदायुक्त त्मना स्वादधि ष्णुभिर्विष्वर्धसो विमहसो जिगाति शेवृधो नृभिः
४

स्वनो न वोऽमवान् रेजयद् वृषा त्वेषो ययिस्तविष एवयामरुत् ।
येना सहन्त ऋञ्जत स्वरोचिषः स्थारश्मानो हिरण्ययाः स्वायुधास इष्मिणः
५

अपारो वो महिमा वृद्धशवस स्त्वेषं शवोऽवत्वेवयामरुत् ।
स्थातारो हि प्रसितौ सदृशि स्थन ते न उरुष्यता निदः शुशुक्वांसो नाग्रयः
६

ते रुद्रासः सुमखा अग्रयो यथा तुविद्युम्ना अवनत्वेवयामरुत् ।
दीर्घं पृथु पप्रथे सद्य पार्थिवं येषामज्मेष्वा महः शर्धास्यद्भुतैनासाम् ७
अद्वेषो नो मरुतो गातुमेतन् श्रोता हव जरितुरैवयामरुत् ।
विष्णोर्महः समन्यवो युयोतन् स्मद् रथ्योर्न न दंसना ऽप द्वेषासि सनुतः ८
गन्ता नो यज्ञं यज्ञियाः सुशमि श्रोता हवमरुन्न एवयामरुत् ।
ज्येष्ठासो न पर्वतासो व्यौमनि यूयं तस्य प्रचेतसः स्यात दुर्धर्तवो निदः ९

समाप्तम्

मंत्र-संख्या

चतुर्थ मण्डलस्यान्तपर्यन्तं १३६४१

पञ्चम मण्डलस्य ७२७

।

सर्वयोगः ४३६८